



REVIZORSKI IZVJEŠTAJI ZA KOJE SU TUŽILAŠTVA DONIJELA ODLUKE O NEPROVOĐENJU ISTRAGE



II DIO



Sarajevo, mart 2024. godine



REVIZORSKI IZVJEŠTAJI ZA KOJE SU TUŽILAŠTVA DONIJELA ODLUKE O NEPROVOĐENJU ISTRAGE

Broj: 01-04-4-964/24


II DIO

Sarajevo, mart 2024. godine



SADRŽAJ

UVOD.....	9
IZVJEŠTAJI REVIZIJE.....	10
FINANSIJSKA REVIZIJA.....	10
A. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU KANTONA SARAJEVO ...	10
1. TEHNIČKI REMONTNI ZAVOD HADŽIĆI D.D. ZA 2021. GODINU	10
2. KANTONALNO JAVNO KOMUNALNO PREDUZEĆE „VODOVOD I KANALIZACIJA“ D.O.O. SARAJEVO ZA 2021. GODINU	12
3. JAVNO PREDUZEĆE „ELEKTROPRIVREDA BIH“ D.D. SARAJEVO ZA 2020. GODINU	14
4. HIDROGRADNJA D.D. SARAJEVO ZA 2019. GODINU	16
5. ZAVOD ZA IZGRADNJU KANTONA SARAJEVO ZA 2019. GODINU.....	17
6. KANTONALNO JAVNO KOMUNALNO PREDUZEĆE „RAD“ D.O.O. SARAJEVO ZA 2019. GODINU	19
7. DIONIČKO DRUŠTVO „SARAJEVOPUTEVI“ SARAJEVO ZA 2018. GODINU	20
8. ELEKTRONSKI RAČUNARSKI CENTAR ZDRAVSTVA I PENZIJSKOG OSIGURANJA D.O.O. SARAJEVO ZA 2017. GODINU	21
9. KANTON SARAJEVO ZA 2017. GODINU	23
10. FEDERALNI FOND ZA ZAPOŠLJAVANJE ZA 2017. GODINU	24
11. KANTONALNO JAVNO PREDUZEĆE ZA GOSPODARENJE DRŽAVNIM ŠUMAMA „SARAJEVO-ŠUME“ D.O.O. SARAJEVO ZA 2017. GODINU	26
12. UNIVERZITET U SARAJEVU ZA 2017. GODINU	27
13. JAVNA USTANOVA „STUDENTSKI CENTAR“ SARAJEVO ZA 2017. GODINU	29
B. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU HERCEGOVAČKO-NERETVANSKOG KANTONA.....	30
C. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU ZENIČKO-DOBOJSKOG KANTONA	30
1. JAVNA USTANOVA KANTONALNA BOLNICA ZENICA ZA 2021. GODINU	30
D. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU UNSKO-SANSKOG KANTONA	32
1. ŠUMSKOPRIVREDNO DRUŠTVO „UNSKO-SANSKE ŠUME“ D.O.O. BOSANSKA KRUPA ZA 2020. GODINU ...	32
2. OPĆINA SANSKI MOST ZA 2020. GODINU.....	33
3. ZAVOD ZDRAVSTVENOG OSIGURANJA UNSKO-SANSKOG KANTONA ZA 2017. GODINU	35
E. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU TUZLANSKOG KANTONA	36
1. JAVNO PREDUZEĆE „MEĐUNARODNI AERODROM TUZLA“ D.O.O. ŽIVINICE ZA 2021. GODINU	36
F. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU SREDNJOBOSANSKOG KANTONA	38
1. JAVNO KOMUNALNO PREDUZEĆE „VITKOM“ D.O.O. VITEZ ZA 2020. GODINU	38
G. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU KANTONA 10 LIVNO	40
1. OPĆINA TOMISLAVGRAD ZA 2021. GODINU	40



2.	OPŠTINA BOSANSKO GRAHOVO ZA 2021. GODINU	42
3.	JAVNO PREDUZEĆE „KOMUNALNO“ D.O.O. LIVNO ZA 2021. GODINU	43
H.	IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU POSAVSKE ŽUPANIJE ...	45
REVIZIJA UČINKA		46
A.	IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU KANTONA SARAJEVO	46
1.	UPRAVLJANJE ROBNIM REZERVAMA U FEDERACIJI BIH	46
B.	IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU HERCEGOVAČKO- NERETVANSKOG KANTONA	47
C.	IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU SREDNJOBOSANSKOG KANTONA	47
1.	PRAĆENJE REALIZACIJE PREPORUKA IZ IZVJEŠTAJA REVIZIJE UČINKA „TRANSPARENTNOST ZAPOŠLJAVANJA U JAVNIM PREDUZEĆIMA FBIH“	48
ZAKLJUČAK GENERALNOG REVIZORA		49



UVOD

Publikacija „Revizorski izvještaji za koje su tužilaštva donijela odluke o neprovođenju istrage – II dio“ odražava kontinuitet napora Ureda za reviziju da unaprijedi transparentnost informacija o rezultatima revizorskog rada i međuinstitucionalnu saradnju s organima za provođenje zakona. Ovim se nastoje maksimizirati efekti obavljenih revizija i podići svijest javnosti o nepravilnostima u radu javnog sektora, što je u skladu sa Strategijom razvoja 2021–2025. i Komunikacijskom strategijom 2023–2025, te INTOSAI-jevim Principom 12 – Vrijednosti i koristi vrhovnih revizijskih institucija.

Temelji ove aktivnosti postavljeni su prošle godine, kada su u prvoj publikaciji ove vrste objedinjeni i prezentirani podaci o postupanju nadležnih tužilaštava po revizorskim izvještajima koje im je Ured za reviziju dostavio u periodu od 2016. do 2022. godine. Riječ je o izvještajima finansijske revizije u kojima su konstatovane materijalno značajne i prožimajuće nepravilnosti, zbog čega su data negativna revizorska mišljenja. Nakon objavljivanja prve publikacije, u martu 2023. godine, Ured za reviziju nastavio je ispunjavati svoju zakonsku obavezu i dostavljati tužilaštvima revizorske izvještaje, te pratiti njihovo postupanje.

Ova publikacija prati status izvještaja finansijske revizije i revizije učinka koji su se u periodu od marta 2023. do februara 2024. godine nalazili u tužilaštvima na nadležnom postupanju. Radi se o **70 izvještaja finansijske revizije**, od kojih su 54 bili dostavljeni tužilaštvima u ranijem periodu, odnosno do kraja 2022. godine, za koja nisu zaprimljeni odgovori o postupanju do objavljivanja prve publikacije, te dodatnih 16 izvještaja dostavljenih u toku 2023. godine.

Pored toga, prati se i status **tri izvještaja revizije učinka**, što je dodatak u odnosu na prvu publikaciju. Predmetni izvještaji dostavljeni su tužilaštvima u prethodnoj godini, budući da su u njima evidentirana značajna kršenja zakona. Revizija učinka, za razliku od finansijske, fokusira se na ispitivanje ekonomičnosti, efikasnosti i efektivnosti programa, odnosno institucija, i ima li mjesta za unapređenje u skladu s tim principima. Ona je okrenuta područjima bitnim za život građana, poput zdravstva, obrazovanja, zaštite okoliša i dr.

Odgovori tužilaštava analizirani u ovoj publikaciji odnose se na ukupno 47 revizorskih izvještaja, od kojih se 44 odnose na finansijsku reviziju i tri na reviziju učinka. Za preostalih 26 izvještaja finansijske revizije koji se nalaze u tužilaštvima na nadležnom postupanju, do zaključenja ove publikacije nisu dostavljene povratne informacije. Odgovori tužilaštava su u najvećoj mjeri prikupljeni zahvaljujući proaktivnom djelovanju Ureda za reviziju. Za svaki revizorski izvještaj za koji tužilaštva nisu dostavila odgovore ili su dostavila nepotpune odgovore Ured za reviziju slao je dodatne dopise tužilaštvima i tražio informacije o preduzetim radnjama.

Revizorski izvještaji sadrže pouzdane informacije koje ukazuju na značajna kršenja zakona, neučinkovito postupanje institucija javnog sektora i rasipanje javnih resursa. Stoga je važno da nadležna tužilaštva na njih adekvatno reaguju i da ih iskoriste, kako bi u skladu sa zakonskim dužnostima istražila slučajeve koji uključuju krivično gonjenje.

U poglavljima koja slijede daje se detaljan pregled revizorskih izvještaja za koje su nadležna kantonalna tužilaštva donijela odluke o neprovođenju istrage, odnosno obustavi istrage sa izvodima iz tužilačkih odluka. Ove odluke odnose se na 24 od ukupno 47 revizorskih izvještaja za koje su tužilaštva dostavila odgovore.



IZVJEŠTAJI REVIZIJE

FINANSIJSKA REVIZIJA

A. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU KANTONA SARAJEVO

Za 23 izvještaja finansijske revizije, koje je Ured za reviziju dostavio Kantonalnom tužilaštvu Kantona Sarajevo, po osnovu člana 16. i/ili 19. Zakona o reviziji, tužilaštvo je dostavilo sljedeće odgovore:

- za 13 izvještaja obavijest o neprovođenju istrage;
- za šest izvještaja informaciju da se aktivno vrše provjere u fazi prijave;
- za jedan izvještaj da je još uvijek status predmeta „otvoren“;
- za jedan izvještaj obavijest da je u fazi donošenja konačne odluke;
- za jedan izvještaj informaciju da je u fazi istrage;

Za jedan izvještaj do dana sastavljanja ove publikacije Tužilaštvo nije dostavilo odgovor.

U nastavku je pregled izvještaja finansijske revizije za koje su dostavljene obavijesti o neprovođenju istrage.

1. TEHNIČKI REMONTNI ZAVOD HADŽIĆI D.D. ZA 2021. GODINU

Izvještaj o finansijskoj reviziji broj: 01-02-09-11-4-3182-7/21 od 28. 9. 2022. godine, dostavljen Tužilaštvu Kantona Sarajevo 26. 10. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Prilikom sastavljanja godišnjih finansijskih izvještaja Uprava nije izvršila procjenu sposobnosti subjekta da nastavi poslovati u vremenski neograničenom periodu u skladu s tačkom 25. MRS-a 1 – Presentacija finansijskih izvještaja. Akumulirani gubitak na 31. 12. 2021. godine iznosi 2.707.581 KM i viši je od trećine osnovnog kapitala. Koeficijent tekuće likvidnosti je 0,33, što ukazuje na to da Društvo tekućim sredstvima nije u mogućnosti blagovremeno izmirivati dospjele obaveze. Ove okolnosti stvaraju sumnju u sposobnost Društva da nastavi s vremenski neograničenim poslovanjem, što nije objavljeno u finansijskim izvještajima u skladu sa Zakonom o računovodstvu i reviziji u FBiH (tačka 7.6 Izvještaja);



2. Ne možemo potvrditi iskazani kapital u iznosu od najmanje 1.491.045 KM jer je uplatu investitora od 1.000.000 KM, koja je namijenjena za pokretanje proizvodnje, Društvo oprihodovalo u cijelom iznosu u ranijem periodu. Također, nije postupljeno u skladu s Odlukom Vlade FBiH prema kojoj se sredstva od 491.045 KM priznaju kao razgraničenja, dok Vlada ne utvrdi njihovu namjenu prema Društvu. Po ovom osnovu potcijenjena su pasivna razgraničenja i akumulirani gubici Društva, a kapital precijenjen (tačke 7.2.3 i 7.3 Izvještaja);
3. Ne možemo potvrditi iskazana materijalna sredstva u pripremi od 1.693.838 KM jer Uprava nije izvršila detaljnu analizu, niti je dostavljen pregled na koje se objekte i opremu imovina odnosi i u kojem periodu je evidentirana, niti je utvrđeno koji se dio koristi, što nije u skladu sa Zakonom o računovodstvu i reviziji u FBiH. Također, s obzirom na to da nije obračunata amortizacija duži niz godina, akumulirani gubitak je potcijenjen, a stalna sredstva precijenjena za iznos amortizacije. Efekat na finansijske izvještaje nismo mogli procijeniti (tačka 7.2.1 Izvještaja);
4. Društvo nije izvršilo rezervisanja za pokrenute sudske sporove u iznosu od najmanje 2.016.085 KM, a odnose se na naknadu štete i tužbe zaposlenika za potraživanja iz radnog odnosa u skladu sa zahtjevima MRS-a 37 – Rezervisanja, potencijalne obaveze i potencijalna sredstva. To može imati za posljedicu da su rashodi i obaveze potcijenjeni, a finansijski rezultat precijenjen (tačka 9. Izvještaja).

b) ZA USKLAĐENOST: S REZERVOM


Osnova za dato mišljenje

1. Društvo nije uspostavilo i osiguralo funkcionisanje odjela interne revizije kao ključnog elementa internog nadzora kojim se osigurava sistematičan, discipliniran pristup ocjeni i poboljšanju efikasnosti upravljanja rizikom, kontrolama i procesima upravljanja, u skladu sa zahtjevima Zakona o internoj reviziji u javnom sektoru u FBiH i Zakona o računovodstvu i reviziji u FBiH (tačka 4. Izvještaja);
2. Prijem u radni odnos na određeno vrijeme provodio se bez javnog oglašavanja, što nije u skladu sa Zakonom o radu, Uredbom o postupku prijema u radni odnos u javnom sektoru u FBiH i Pravilnikom o radu Društva (tačka 4. Izvještaja);
3. Prilikom godišnjeg popisa imovine i obaveza nije izvršen popis potraživanja, obaveza i novčanih sredstava, nije izvršena analiza upotrebljivosti zaliha i nisu izvršena usaglašavanja potraživanja i obaveza putem izvoda otvorenih stavki, što nije u skladu sa Zakonom o računovodstvu i reviziji u FBiH (tačka 7.2.5 Izvještaja).

- **OBAVIJEST O NEPROVOĐENJU ISTRAGE od 25. 12. 2023. godine**

Tužilaštvo je 25. 12. 2023. godine u predmetu broj T09 0 KTAPO 0181864 22, u skladu sa članom 231. stav 3. Zakona o krivičnom postupku Federacije BiH, donijelo naredbu da se istraga neće provoditi povodom Izvještaja o finansijskoj reviziji „Tehničkog remontnog zavoda“ d.d. Hadžići za 2021. godinu, **jer je iz prijave i pratećih spisa očigledno da prijavljeno djelo nije krivično djelo.**





2. KANTONALNO JAVNO KOMUNALNO PREDUZEĆE „VODOVOD I KANALIZACIJA“ D.O.O. SARAJEVO ZA 2021. GODINU

Izveštaj o finansijskoj reviziji broj: 01-02-09-11-4-2723-6/21 od 27. 7. 2022. godine, dostavljen Tužilaštvu Kantona Sarajevo 1. 11. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: **NEGATIVNO**

Osnova za dato mišljenje

1. Na datum bilansa nije izvršena ocjena postoje li bilo kakvi pokazatelji da je vrijednost nekog sredstva umanjena, niti je vršena procjena nadoknadive vrijednosti za takva sredstva shodno odredbama MRS-a 36 – Umanjenje vrijednosti imovine i Zakona o računovodstvu i reviziji u FBiH. Imovina je iskazana u iznosu od 815.408.552 KM, od čega se značajan dio od 225.716.377 KM odnosi na investicije u toku na kojima nije bilo promjena od 1992. godine. To može imati za posljedicu da je nadoknadivi iznos sredstava manji od njihove knjigovodstvene vrijednosti, odnosno da su sredstva i finansijski rezultat za 2021. godinu precijenjeni (tačka 7.2.1 Izvještaja);
2. Na poziciji investicija u toku iskazan je uređaj za prečišćavanje otpadnih voda i pripadajuća oprema u Butilama u iznosu od 47.345.984 KM koji je stavljen u funkciju, ali Društvo nije aktiviralo investiciju u skladu sa zahtjevima MRS-a 16 – Nekretnine, postrojenja i oprema. Navedeno ima za posljedicu da su rashodi i finansijski rezultat potcijenjeni jer nije obračunata amortizacija za sredstvo koje je u funkciji i od kojeg se ostvaruju ekonomske koristi (tačka 7.2.1 Izvještaja);
3. Ne možemo potvrditi iskazanu vrijednost zaliha u iznosu od najmanje 1.559.513 KM jer Društvo nije vršilo vrednovanje zaliha u skladu s MRS-om 2 – Zalihe, a radi se o zalihama za koje je Društvo izvršilo analizu strukture i koje su nabavljene u ranijim periodima. Efekte usklađivanja na finansijski rezultat nismo mogli kvantificirati (tačka 6.2.2.1 Izvještaja);
4. Ne možemo potvrditi strukturu i visinu iskazanog kapitala od 700.482.636 KM jer je u okviru rezervi iskazan osnovni kapital od 713.762.573 KM, iako je osnovni kapital u 100% vlasništvu Kantona Sarajevo i iznosi 10.000 KM. Iskazivanje vlasničkog kapitala na rezervama nije u skladu s Konceptualnim okvirom za finansijsko izvještavanje, a pravo na ovaj kapital nije utvrđeno (tačka 7.2.3 Izvještaja);
5. Prilikom sastavljanja godišnjih finansijskih izvještaja Uprava Društva nije izvršila procjenu sposobnosti subjekta da nastavi poslovati u vremenski neograničenom periodu u skladu s tačkom 25 MRS-a 1 – Prezentacija finansijskih izvještaja. Društvo je u 2021. godini ostvarilo neto gubitak u iznosu od 13.289.937 KM, a kontinuirano bilježi gubitke koji su od 2012. do 2021. godine iznosili 185.518.099 KM, ima značajne gubitke vode, a cijena vode nije formirana u skladu sa Zakonom o komunalnim djelatnostima Kantona Sarajevo. Ove okolnosti stvaraju sumnju u sposobnost Društva da nastavi s vremenski neograničenim poslovanjem, što nije objavljeno u finansijskim izvještajima u skladu sa Zakonom o računovodstvu i reviziji u FBiH (tačka 7.5 Izvještaja).

**b) ZA USKLAĐENOST: S REZERVOM****Osnova za dato mišljenje**


1. Cijena vode nije sačinjena u skladu sa Zakonom o komunalnim djelatnostima Kantona Sarajevo jer u nju nije uključena amortizacija, koja se sastoji iz amortizacije stalnih sredstava davaoca komunalne usluge (Društvo) i amortizacije stalnih sredstava infrastrukturnog komunalnog sistema (vodovodne i kanalizacione mreže), odnosno javnih dobara u općoj upotrebi, što za posljedicu ima da cijena nije formirana na ekonomskim pokazateljima (tačka 5. izvještaja);
2. Organi upravljanja nisu poduzeli odgovarajuće aktivnosti kako bi Društvo zaštitili od negativnih ekonomskih posljedica gubitaka vode, za koje smo utvrdili da iznose cca 71%, a koji ukazuju na bespravne priključke, potrebu sanacije vodovodne infrastrukture i potrebu uvođenja u sistem javnog vodosnabdijevanja svih korisnika na području Kantona Sarajevo. Navedeno nije u skladu sa Zakonom o privrednim društvima, prema kojem su u obavezi da poslove obavljaju savjesno, s pažnjom dobrog privrednika i u razumnom uvjerenju da djeluju u najboljem interesu Društva (tačke 5. i 7.1.1.1 Izvještaja);
3. Prilikom godišnjeg popisa imovine, kod popisa zemljišta i građevinskih objekata nije izvršena analiza vlasništva i raspolaganja nad iskazanom imovinom, nije izvršena analiza neupotrebljivih zaliha, investicije u toku su samo prepisane iz knjigovodstvenih evidencija, te nije izvršen popis vanbilansne evidencije u skladu sa Zakonom o računovodstvu i reviziji u FBiH (tačka 7.2.5 Izvještaja);
4. Društvo nije dostavilo trogodišnji plan poslovanja Uredu za reviziju institucija u FBiH u skladu s odredbama člana 22. Zakona o javnim preduzećima u FBiH (tačka 6. Izvještaja).

- OBAVIJEST O NEPROVOĐENJU ISTRAGE od 2. 6. 2023. godine

U skladu s članom 231. stav 4. Zakona o krivičnom postupku Federacije BiH, tužilaštvo je 2. 6. 2023. godine donijelo naredbu da se istraga neće provoditi povodom Izvještaja o finansijskoj reviziji KJKP-a „Vodovod i kanalizacija“ d.o.o. Sarajevo za 2021. godinu, **jer iz prijave i pratećih spisa očigledno proizilazi da prijavljeno djelo nije krivično djelo.**

**PRITUŽBA NA OBAVIJEST O NEPROVOĐENJU ISTRAGE broj 09-11-4-3-3148-2/22 od 12. 6. 2023. godine**

Negativno mišljenje za finansijske izvještaje dato je jer nismo mogli potvrditi iskazani finansijski rezultat Društva zato što nije izvršena ocjena nadoknadive vrijednosti stalnih sredstava i investicija u toku, nije izvršen prenos sa investicija u toku uređaja za prečišćavanje otpadnih voda i pripadajuće opreme u Butilama, iako je stavljena u funkciju, i zalihe sirovina, materijala i rezervnih dijelova nisu vrednovane u skladu sa zahtjevima Međunarodnih računovodstvenih standarda i Međunarodnih standarda finansijskog izvještavanja. Da je navedeno urađeno, finansijski rezultat (gubitak) bio bi znatno veći, ali mi nismo mogli utvrditi efekte.

**RJEŠENJE od 13. 9. 2023. godine**

Odbija se kao neosnovana pritužba Ureda za reviziju institucija u Federaciji Bosne i Hercegovine, podnesena povodom donošenja Naredbe da se istraga u predmetu broj T09 0 KTAPO 0181403 22 od 2. 6. 2023. godine neće provoditi, jer iz prijave i pratećih spisa očigledno proizilazi da prijavljeno djelo nije krivično djelo.

3. JAVNO PREDUZEĆE „ELEKTROPRIVREDA BIH“ D.D. SARAJEVO ZA 2020. GODINU

Izveštaj o finansijskoj reviziji broj: 01-02-09-11-4-2040-6/20 od 30. 9. 2021. godine, dostavljen Tužilaštvu Kantona Sarajevo 30. 11. 2020. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA**a) ZA FINANSIJSKE IZVJEŠTAJE: NEGATIVNO****Osnova za dato mišljenje**

1. Na datum bilansa nije izvršena procjena umanjenja vrijednosti sredstava u dijelu ulaganja u zavisna društva, iskazanih u iznosu od 414.803.402 KM, i investicija u toku u iznosu od najmanje 30.516.693 KM, na kojima nije bilo promjena u 2020. godini, kao ni u prethodne dvije godine (od kojih je najznačajnija investicija u HE Vranduk: 21.952.783 KM), što nije u skladu sa MRS-om 36 – Umanjenje vrijednosti sredstava. To može imati za posljedicu da je nadoknativi iznos sredstava manji od njihove knjigovodstvene vrijednosti, odnosno da su sredstva i finansijski rezultat za 2020. godinu precijenjeni (tačka 7.2.1 Izveštaja);
2. Društvo nije izvršilo procjenu očekivanih kreditnih gubitaka za date avanse zavisnim društvima – rudnicima u iznosu od 61.144.842 KM, koji su stariji od 365 dana, u skladu sa zahtjevima MSFI-ja 9 – Finansijski instrumenti. Navedeno može imati za posljedicu da su za ovaj iznos rashodi potcijenjeni, a imovina (potraživanja) i finansijski rezultat precijenjeni (tačka 7.2.2.1 Izveštaja).

b) ZA USKLAĐENOST: S REZERVOM**Osnova za dato mišljenje**

1. Tenderska dokumentacija za nabavku autohtone riblje mlađi/ribe za poribljavanje ribolovnih zona voda sliva rijeke Neretve nije sačinjena u skladu sa Zakonom o javnim nabavkama i podzakonskim propisima, niti su postupci pokrenuti blagovremeno, što je za posljedicu imalo da nisu provedeni za 2020. godinu. Zbog toga Društvo nije osiguralo nesmetano poribljavanje kako nalaže Zakon o slatkovodnom ribarstvu. Društvo je uslijed nerealizacije ovih nabavki za period od 2016. do 2018. godine, zbog sudskih presuda i Sporazuma sa ribolovnim udruženjima, u 2020. godini iskazalo troškove u iznosu od 734.600 KM (tačka 8.2 Izveštaja);



2. Nabavke roba, usluga i radova u iznosu od najmanje 8.441.046 KM nisu vršene u skladu s odredbama Zakona o javnim nabavkama zbog neblagovremenog pokretanja postupaka, pogrešnog odabira postupka i propusta kod sačinjavanja tenderske dokumentacije (tačka 8.3 Izvještaja).

- **OBAVIJEST O NEPROVOĐENJU ISTRAGE od 31. 3. 2023. godine**

Kantonalno tužilaštvo Kantona Sarajevo donijelo je naredbu da se istraga neće provoditi u predmetu otvorenom po Dopisu Ureda za reviziju institucija u FBiH broj 04-11-3090/20 od 30. 11. 2020. godine, kojim se Tužilaštvu dostavlja Izvještaj o finansijskoj reviziji JP-a „Elektroprivreda BiH“ d.d. za 2020. godinu, u kojem je izraženo negativno mišljenje o finansijskim izvještajima i mišljenje s rezervom o usklađenosti. Nije se konkretno mogao odrediti nikakav nezakonit postupak direktora ili članova Nadzornog odbora ovog preduzeća kojim bi se ostvarila obilježja bića nekog krivičnog djela propisanog KZ-om FBiH.




PRITUŽBA NA INFORMACIJU O NAČINU OKONČANJA PREDMETA broj 09-11-4-3090-2/20 od 5. 4. 2023. godine

Ured za reviziju institucija u Federaciji Bosne i Hercegovine zaprimio je 4. 4. 2023. godine informaciju da se neće provoditi istraga u predmetu otvorenom po dostavljenom Izvještaju o finansijskoj reviziji JP-a „Elektroprivreda BiH“ d.d. Sarajevo za 2020. godinu, jer ne postoje obilježja krivičnog djela propisanog Krivičnim zakonom FBiH. Negativno mišljenje za finansijske izvještaje dato je jer nismo mogli potvrditi iskazani finansijski rezultat (dobit) Društva, što znači da finansijski izvještaji nisu istiniti i fer, kao i da su pogrešna prikazivanja značajna i prožimajuća. Društvo nije izvršilo procjenu nadoknadivog iznosa ulaganja u zavisna društva (rudnike), kao ni procjenu nadoknadivog iznosa za date avanse rudnicima, niti je izvršena procjena nadoknadive vrijednosti investicija u toku shodno zahtjevima Međunarodnih računovodstvenih standarda i Međunarodnih standarda finansijskog izvještavanja. Da je navedeno urađeno, finansijski rezultat bio bi značajno manji, ali mi nismo mogli utvrditi efekte.

RJEŠENJE od 21. 7. 2023. godine

Odbija se kao nedopuštena pritužba Ureda za reviziju institucija u Federaciji Bosne i Hercegovine, podnesena povodom donošenja Naredbe da se istraga neće provoditi u predmetu broj T09 0 KTAK 0173549 21 od 21. 3. 2023. godine, jer iz prijave i pratećih spisa proizilazi da prijavljeno djelo nije krivično djelo.



4. HIDROGRADNJA D.D. SARAJEVO ZA 2019. GODINU

Izveštaj o finansijskoj reviziji broj: 01-02-09-11-4-2268-6/19 od 26. 8. 2020. godine, dostavljen Tužilaštvu Kantona Sarajevo 3. 12. 2020. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: **NEGATIVNO**

Osnova za dato mišljenje

1. Nekretnine, postrojenja i oprema i revalorizacione rezerve potcijenjene su za 36.048.006 KM jer Društvo nije evidentiralo povećanje na ovim pozicijama prema izvršenoj procjeni. To nije u skladu s tačkom 39 MRS-a 16 – Nekretnine, postrojenja i oprema (tačka 6.2.1 Izvještaja);
2. Društvo za iskazane zalihe gotovih proizvoda u iznosu od 639.304 KM nema podatke, niti prati efekte troškova zaliha i njihovo učešće u cijeni koštanja. Uspostavljene evidencije ne daju podatak o stvarnoj cijeni, ne može se utvrditi koja je cijena niža (prodajna ili cijena koštanja) radi pravilnog mjerenja vrijednosti zaliha. To nije u skladu sa MRS-om 2 – Zalihe (tačka 6.2.2.1 Izvještaja);
3. Društvo je u prethodnim godinama poslovalo s konstantnim gubicima. Akumulirani gubici iz prethodnih godina, postojanje značajnih sudskih predmeta i potencijalnih obaveza, te otežana sposobnost u izmirenju tekućih obaveza izražavaju sumnju u sposobnost Društva da posluje neograničeno. Prilikom sastavljanja finansijskih izvještaja Uprava Društva nije postupila u skladu s tačkom 25 MRS-a 1 – Presentacija finansijskih izvještaja, jer nije izvršila procjenu niti je objavila značajnu neizvjesnost u vezi s neograničenim poslovanjem u budućnosti (tačka 6.5 Izvještaja).

b) ZA USKLAĐENOST: **S REZERVOM**

Osnova za dato mišljenje

1. Stečajni plan reorganizacije za privredno društvo Hidrogradnja d.d. Sarajevo u stečaju ne uključuje način izvršenja reorganizacije, posebno u dijelu izvora finansiranja i finansijskog plana za njegovu primjenu, kako nalaže Zakon o stečajnom postupku FBiH. Također, nakon neuspjele prve licitacije nije dat prijedlog Odboru povjerilaca na osnovu kojeg bi se donijela odluka o drugim načinima i uslovima unovčenja stečajne mase za svaku narednu licitaciju. To nije u skladu sa Stečajnim planom Društva, koji su stečajni sudija i Odbor povjerilaca prihvatili u septembru 2019. godine (tačka 5. Izvještaja).



- **OBAVIJEST O NEPROVOĐENJU ISTRAGE od 14. 3. 2023. godine**

Na osnovu člana 231. stav 4. Zakona o krivičnom postupku FBiH Tužilaštvo je 14. 3. 2023. godine donijelo Naredbu da se neće provoditi istraga protiv pravnog lica Hidrogradnja d.d. Sarajevo u stečaju, zbog krivičnog djela nesavjestan rad u službi iz čl. 387. stav 1. KZ FBiH, jer iz prijave i pratećih spisa proizilazi da prijavljeno djelo nije krivično djelo.



5. ZAVOD ZA IZGRADNJU KANTONA SARAJEVO ZA 2019. GODINU

Izveštaj o finansijskoj reviziji broj: 01-02-07-11-2-2096-7/19 od 29. 9. 2020. godine, dostavljen Tužilaštvu Kantona Sarajevo 3. 12. 2020. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Ne potvrđujemo iskazanu vrijednost stalnih sredstava s obzirom na to da se nismo uvjerali da su sva stalna sredstva kojima Zavod raspolaže knjigovodstveno evidentirana, da za najmanje 25.282.778 KM knjigovodstveno evidentiranih stalnih sredstava nije prezentirana vjerodostojna dokumentacija kojom se potvrđuje da je Zavod njen vlasnik ili korisnik prava raspolaganja, da u pomoćnu knjigu stalnih sredstava nisu evidentirana stalna sredstva u obliku prava, koja su iskazana u iznosu od 13.475.615 KM, što nije u skladu sa Zakonom o računovodstvu i reviziji u FBiH i njegovim podzakonskim aktima (tačke 4. i 7.2.2 Izvještaja);
2. Ne možemo potvrditi potraživanja po osnovu posebne naknade za legalizaciju građevina izgrađenih bez odobrenja za građenje i građevina privremenog karaktera, koja su iskazana u iznosu od 11.034.819 KM, s obzirom na to da se ne vrši usaglašavanje s nadležnim općinskim službama koje izdaju rješenja o ovim naknadama, da se ne prati dospijeće i ne vrši kontrola njihove naplate, te da nisu uspostavljene pomoćne knjige, odnosno analitičke evidencije ovih potraživanja u skladu s odredbama Zakona o računovodstvu i reviziji u FBiH, Zakona o budžetima u FBiH i njegovim podzakonskim aktima (tačke 4. i 7.2.1 Izvještaja);



3. Ne potvrđujemo iskazani iznos razgraničenih prihoda i primitaka od 27.713.013 KM s obzirom na to da je naknadnim popisom njihovo stanje utvrđeno u iznosu od 30.165.465 KM. Zavod ne vrši usaglašavanje razgraničenih prihoda i primitaka sa povezanim rashodima i izdacima i stanjima na namjenskim podračunima, zbog čega ne možemo potvrditi ni priznate neporezne prihode koji su u Godišnjem izvještaju o izvršenju budžeta za 2019. godinu iskazani u iznosu od 1.776.954 KM (tačke 7.1.1 i 7.2.3 Izvještaja).

b) ZA USKLAĐENOST: S REZERVOM

Osnova za dato mišljenje

1. Zavod provodi javne nabavke u ime i za račun drugih ugovornih organa, iako to nisu poslovi iz njegove nadležnosti utvrđeni članom 24. Zakona o organizaciji i djelokrugu organa uprave i uprave i upravnih organizacija Kantona, što značajno utiče na efikasnost obavljanja stručnih i drugih poslova za koje je osnovan. S obzirom na to da Zavod nije uspostavljen kao centralni nabavni organ, niti se radi o zajedničkim nabavkama, navedeno nije u skladu ni sa Zakonom o javnim nabavkama i njegovim provedbenim propisima (tačke 5. i 8. Izvještaja);
2. Nije izvršen popis stalnih sredstava u pripremi, stalnih sredstava u obliku prava, dijela građevina, potraživanja, te kratkoročnih obaveza i razgraničenja, niti je izvršeno usklađivanje stvarnog sa knjigovodstvenim stanjem u skladu s članom 25. Zakona o računovodstvu i reviziji u FBiH i odredbama Uredbe o računovodstvu budžeta u FBiH i Pravilnika o knjigovodstvu budžeta u FBiH (tačka 7.2.4 Izvještaja).

- OBAVIJEST O NEPROVOĐENJU ISTRAGE od 15. 4. 2022. godine

Tužilaštvo je u skladu s članom 231. stav 3. ZKP FBiH 23. 2. 2021. godine, pod brojem T09 0 KTAPO 0163529 20, donijelo Naredbu da se istraga neće provoditi povodom Izvještaja o finansijskoj reviziji Zavoda za izgradnju Kantona Sarajevo za 2019. godinu, **jer je iz prijave i pratećih spisa očigledno da prijavljeno djelo nije krivično djelo.**





6. KANTONALNO JAVNO KOMUNALNO PREDUZEĆE „RAD“ D.O.O. SARAJEVO ZA 2019. GODINU

Izveštaj o finansijskoj reviziji broj: 01-02-09-11-4-2114-6/19 od 2. 6. 2020. godine, dostavljen Tužilaštvu Kantona Sarajevo 3. 12. 2020. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO


Osnova za dato mišljenje

1. Društvo nije izvršilo ispravku vrijednosti zastarjelih potraživanja na teret rashoda u iznosu od 8.775.522 KM, koja su utužena u ranijim godinama, u skladu sa zahtjevima MSFI-ja 9 – Finansijski instrumenti. Da je izvršena ispravka vrijednosti zastarjelih potraživanja kako nalaže Standard, Društvo bi iskazalo negativan finansijski rezultat u iznosu od 8.706.510 KM (tačka 6.2.2.3 Izvještaja);
2. Društvo ostvaruje značajan prihod od izdavanja garaže kolektivnog parkiranja na Ciglanama, a nije regulisano pravo korištenja i raspolaganja nad ovom imovinom. Navedeno je uticalo na to da imovina kojom Društvo raspolaže nije iskazana u poslovnim knjigama i finansijskim izvještajima Društva u skladu s Međunarodnim standardom finansijskog izvještavanja 16 – Najmovi (tačka 6.2.1 Izvještaja);
3. Dio iskazanih revalorizacionih rezervi u iznosu od 11.628.840 KM ne može se potvrditi jer nije prezentirana relevantna dokumentacija na osnovu koje bi se potvrdio osnov evidentiranja na navedenoj bilansnoj poziciji, što je imalo uticaja na iskazani kapital Društva (tačka 6.2.3. Izvještaja);
4. Društvo nije izvršilo rezervisanja za izvjesne sudske sporove u ukupnoj vrijednosti od 370.402 KM u skladu sa zahtjevima MRS-a 37 – Rezervisanja, potencijalne obaveze i potencijalna sredstva. To za posljedicu ima da su rashodi i obaveze potcijenjeni, a finansijski rezultat precijenjen (tačka 8. Izvještaja).

b) ZA USKLAĐENOST: S REZERVOM

Osnova za dato mišljenje

1. Nisu primijenjene odredbe Zakona o javnim nabavkama u dijelu pravilnog sačinjavanja tenderske dokumentacije kod nabavke autosmečara (tačka 7. Izvještaja);
2. Godišnji popis imovine nije izvršen u skladu s članom 25. i 28. Zakona o računovodstvu i reviziji u FBiH (tačka 6.2.6 Izvještaja).

**OBAVIJEST O NEPROVOĐENJU ISTRAGE od 8. 3. 2023. godine**

U vezi s članom 231. stav 4. ZKP-a FBiH, Tužilaštvo je 8. 3. 2023. godine donijelo Naredbu o neprovođenju istrage protiv [REDAKTIRANO], jer iz prijave i pratećih spisa proizilazi da ne postoje osnovi sumnje da su prijavljene osobe počinile krivično djelo, dok u odnosu na prijavu u pogledu postupanja protivno Zakonu o javnim nabavkama BiH postoje druge okolnosti koje isključuju krivično gonjenje.

**7. DIONIČKO DRUŠTVO „SARAJEVOPUTEVI“ SARAJEVO ZA 2018. GODINU**

Izveštaj o finansijskoj reviziji broj: 01-02-09-14-4-2041-6/18 od 2. 9. 2019. godine, dostavljen Tužilaštvu Kantona Sarajevo 27. 11. 2019. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA**a) ZA FINANSIJSKE IZVJEŠTAJE: NEGATIVNO****Osnova za dato mišljenje**

1. Društvo nije izvršilo mjerenje vrijednosti nadoknadivog iznosa ulaganja u Društvo za proizvodnju građevinskog materijala Misoča d.o.o. Ilijaš u iznosu od 197.588 KM, u skladu sa tačkom 5.2.1 MSFI-ja 9 – Finansijski instrumenti, što ima za posljedicu da su ostali dugoročni finansijski plasmani i finansijski rezultat precijenjeni, a rashodi potcijenjeni za navedeni iznos (tačka 6.2.1.3 Izvještaja);
2. Prihodi tekućeg perioda više su iskazani za 125.497 KM, a rashodi manje za 166.831 KM, jer nisu evidentirani u periodu kojem pripadaju, što nije u skladu sa članom 33. Zakona o računovodstvu i reviziji u FBiH i tačkama 4.47 i 4.49 Okvira za finansijsko izvještavanje. Navedeno je imalo za posljedicu da je finansijski rezultat precijenjen za 292.328 KM (tačke 6.1.1.3 i 6.2.4.2 Izvještaja);
3. Ne možemo potvrditi strukturu stalnih sredstava i iskazanog kapitala u iznosu od 1.901.700 KM na dan 31. 12. 2018. godine, jer je Društvo u prethodnim godinama povećanje vrijednosti zemljišta evidentiralo na pozicijama „Investicione nekretnine“ i „Prihodi“, umjesto na pozicijama „Zemljište“ i „Kapital – revalorizacione rezerve“ (tačka 6.2.1.2 Izvještaja).

**b) ZA USKLAĐENOST: NEGATIVNO****Osnova za dato mišljenje**

1. Nabavke roba i usluga u 2018. godini, u vrijednosti od 5.319.736 KM, izvršene su bez provođenja postupaka i procedura propisanih Zakonom o javnim nabavkama (tačka 7. Izvještaja).

- OBAVIJEST O NEPROVOĐENJU ISTRAGE od 21. 6. 2023. godine


Kantonalno tužilaštvo Kantona Sarajevo je na osnovu člana 231. stav 3. Zakona o krivičnom postupku Federacije Bosne i Hercegovine donijelo naredbu da se neće provoditi istraga protiv ██████████, direktora pravnog lica „Sarajevoputevi“ d.d. Sarajevo, zbog krivičnog djela izrada lažne bilance iz člana 249. stav 1. Krivičnog zakona Federacije Bosne i Hercegovine i zloupotreba položaja ili ovlaštenja iz člana 383. stav 1. KZ FBiH, jer iz prijave i pratećih spisa proizilazi kao očigledno da prijavljeno djelo nije krivično djelo.

**8. ELEKTRONSKI RAČUNARSKI CENTAR ZDRAVSTVA I PENZIJSKOG OSIGURANJA
D.O.O. SARAJEVO ZA 2017. GODINU**

Izvještaj o finansijskoj reviziji broj: 01-02-09-14-4-13-1396-4/17 od juna 2018. godine, dostavljen Tužilaštvu Kantona Sarajevo 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA**a) ZA FINANSIJSKE IZVJEŠTAJE: POZITIVNO****b) ZA USKLAĐENOST: NEGATIVNO****Osnova za dato mišljenje**

1. Za izvršene nabavke roba i usluga iskazane vrijednosti u iznosu od 551.326 KM u 2017. godini, iako je bilo u obavezi, Društvo nije primjenjivalo odredbe Zakona o javnim nabavkama (tačka 7. Izvještaja).

**- OBAVIJEST O NEPROVOĐENJU ISTRAGE od 24. 3. 2023. godine**

Tužilaštvo obavještava da je utvrđeno da ne postoje obilježja krivičnog djela zloupotrebe položaja ili ovlaštenja iz člana 383. stav 1 KZ FBiH, zbog čega je u skladu s članom 231. stav 3. ZKP-a FBiH odlučeno je da istraga protiv [REDACTED], kao i odgovornih lica Elektronskog računarskog centra zdravstva i penzijskog osiguranja d.o.o. Sarajevo, neće provoditi.

**PRITUŽBA NA OBAVJEŠTENJE O NEPROVOĐENJU ISTRAGE broj 09-04-4-2536-2/18 od 29. 3. 2023. godine**

Ured za reviziju institucija u Federaciji Bosne i Hercegovine zaprimio je 28. 3. 2023. godine informaciju da se neće provoditi istraga u predmetu otvorenom po dostavljenom Izvještaju o finansijskoj reviziji „Elektronskog računarskog centra zdravstva i penzijskog osiguranja“ d.o.o. Sarajevo, jer ne postoje obilježja krivičnog djela zloupotrebe položaja ili ovlaštenja.

Navedeno se odnosi na to da je Društvo u 2017. godini vršilo nabavke roba i usluga u vrijednosti od 551.326 KM bez provođenja postupka i procedura utvrđenih Zakonom o javnim nabavkama. Naime, član 4. stav 1. tačka b) Zakona o javnim nabavkama definisao je da se pravna osoba – koja je osnovana za određenu svrhu, u cilju zadovoljenja potreba od općeg interesa, a koja nema industrijski ili komercijalni karakter i ispunjava jedan od sljedećih uslova: a) finansirana je najvećim dijelom iz javnih sredstava (Društvo 65,57% prihoda ostvaruje od FZMIO/PIO); b) nadzor nad upravljanjem provodi ugovorno tijelo (100% FZMIO/PIO), c) svi članovi Skupštine su izabrani predstavnici FTMIO/PIO – obavezna primjenjivati odredbe Zakona o javnim nabavkama.

RJEŠENJE od 18. 7. 2023. godine

Odbija se kao nedopuštena pritužba Ureda za reviziju institucija u Federaciji Bosne i Hercegovine, podnesena povodom donošenja Naredbe da se istraga neće provoditi u predmetu broj T09 0 KTPO 0131498 22 od 24. 3. 2023. godine, jer djelo koje su počinili prijavljeni nije krivično djelo.



9. KANTON SARAJEVO ZA 2017. GODINU

Izveštaj o finansijskoj reviziji broj: 01-02-07-14-2-1-1429-6/17 od 6. 9. 2018. godine, dostavljen Tužilaštvu Kantona Sarajevo 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: **S REZERVOM**


Osnova za dato mišljenje

1. Ne možemo potvrditi iskazana potraživanja u iznosu od 34.519.367 KM s obzirom na to da su pojedina priznata bez propisane računovodstvene isprave, a određena nisu ni unesena u Glavnu knjigu, kao i da sa kupcima na datum bilansa nisu izvršena usaglašavanja, kako je to propisano članom 28. Zakona o računovodstvu i reviziji u FBiH (tačka 6.2.1.2 Izvještaja);
2. Ne možemo potvrditi stanje dugoročnih plasmana Ministarstva za boračka pitanja u iznosu od 7.923.027 KM, koji se odnose na kredite za zapošljavanje date pripadnicima boračke populacije u ranijem periodu, budući da je za znatan dio ovih plasmana donesena odluka o obustavi postupka prinudne naplate zbog nenaplativosti (tačka 6.2.3 Izvještaja);
3. Transakcijski računi JU Kantonalni centar za socijalni rad i JU Zavod za vaspitanje muške djece i omladine, na kojima su iskazana sredstva u ukupnom iznosu od 541.931 KM, nisu u sistemu Glavne knjige trezora, što nije u skladu s članom 15. Zakona o trezoru u FBiH (tačke 6.2.1.1 i 9.2 Izvještaja).

b) ZA USKLAĐENOST: **S REZERVOM**

Osnova za dato mišljenje

1. Ugovor o zakupu stanova za lica u stanju socijalne potrebe u objektima 0-9 i 0-10 na lokaciji Otes, koji je Kanton Sarajevo zaključio 2002. godine sa firmom „GPA – Društvo za razvoj i stanogradnju“ d.o.o. Sarajevo na period od 30 godina, više je nego nepovoljan i po osnovu njega se iz Budžeta Kantona godišnje izdvajaju značajna sredstva. Samo u 2017. godini, po osnovu zakupa ovih objekata i troškova održavanja zajedničkih prostorija, iskazani su izdaci u iznosu od 2.972 KM. Pošto najveći dio korisnika stanova ne izmiruje ni obaveze za komunalne naknade, izvjesno je da će se one izmiriti iz Budžeta Kantona, a sada iznose 409.874 KM (tačka 6.1.2.3 Izvještaja);
2. Ministarstvo privrede nije na efikasan način upravljalo poslovnim prostorima u vlasništvu privrednih subjekata drugih država, koji su mu dati u nadležnost Odlukom Skupštine Kantona o načinu upravljanja imovinom poslovnih jedinica sa i bez svojstva pravnog lica iz drugih država na području Kantona Sarajevo. Naime, u 2017. godini ostvaren je prihod od samo 127.656 KM, dok, prema prezentiranim podacima, ukupne obaveze korisnika poslovnih prostora na 31. 12. 2017. godine iznose 4.130.494 KM (tačka 6.1.1.2 Izvještaja);



3. Nabavka robnih rezervi Direkcije za robne rezerve u iznosu od 804.914 KM, radovi na rekonstrukciji raskrsnice na Trgu heroja u naselju Hrasno u iznosu od 291.940 KM i radovi na rekonstrukciji puta Sinanovići – Puzim na području Trnova u iznosu od 174.531 KM Direkcije za puteve, izvršeni su bez provođenja procedure odabira najpovoljnijeg dobavljača u skladu s odredbama Zakona o javnim nabavkama (tačka 8. Izvještaja);
4. U okviru izdataka za ugovore o djelu koji su iskazani u iznosu od 3.905.405 KM značajan dio odnosi se na naknade licima koja su angažovana za obavljanje poslova sistematiziranih pravilnicima o unutarnjoj organizaciji. Nije bilo osnova da se ugovori o djelu zaključuju za poslove koji su sistematizovani, s obzirom na to da predmeti ovih ugovora nisu regulisani propisima o radu i internim aktima budžetskih korisnika (tačka 6.1.2.2 Izvještaja).

- **OBAVIJEST O NEPROVOĐENJU ISTRAGE od 18. 4. 2023. godine**

Tužilaštvo je dopisom od 18. 4. 2023. godine obavijestilo Ured za reviziju da je za Kanton Sarajevo za 2017. godinu donesena Naredba o neprovođenju istrage.



10. FEDERALNI FOND ZA ZAPOŠLJAVANJE ZA 2017. GODINU

Izvještaj o finansijskoj reviziji broj: 01-02-08-14-3-1-1372-6/17 od 28. 9. 2018. godine, dostavljen Tužilaštvu Kantona Sarajevo 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: S REZERVOM

Osnova za dato mišljenje

1. Ne može se potvrditi iskazano stanje sumnjivih i spornih potraživanja u finansijskim izvještajima na 31. 12. 2017. godine u iznosu od 14.214.345 KM jer nije izvršeno njihovo usaglašavanje sa stvarnim stanjem u skladu s članom 28. Zakona o računovodstvu i reviziji u FBiH. Zavod nije poduzeo odgovarajuće aktivnosti kako bi potraživanja bila naplaćena ili otpisana u većem obimu, što nije u skladu s članom 46. Zakona o budžetima u FBiH (tačke 6.2.1 i 6.2.6 Izvještaja);



2. Dospjele kamate po osnovu potraživanja za nenaplaćenu glavnice, za date komisione kredite u ranijem periodu, nisu evidentirane u Glavnoj knjizi. Također, knjigovodstveno stanje potraživanja po osnovu dospjele, a nenaplaćene glavnice za ove kredite, nije usaglašeno sa iskazanim stanjem u izvještajima banaka komisionara za iznos od najmanje 137.433 KM, zbog čega se ne mogu potvrditi iskazana dugoročna potraživanja u iznosu od 22.768.084 KM (tačke 6.2.4.1 i 6.2.6 Izvještaja).

b) ZA USKLAĐENOST: S REZERVOM


Osnova za dato mišljenje

1. Zaključeni, a nerealizovani ugovori za provođenje mjera aktivne politike zapošljavanja u iznosu od 14.412.824 KM preneseni su na realizaciju u narednu, 2018. godinu. Iako su za navedene namjene u Finansijskom planu za 2017. godinu bila osigurana sredstva u iznosu od 29.930.000 KM, prenošenje ugovora na realizaciju u naredni period uticalo je na smanjenje efekata zapošljavanja, što nije u skladu s članom 4. Zakona o budžetima u FBiH (tačka 6.1.2.3.2 Izvještaja);
2. Zavod nije poduzeo adekvatne aktivnosti da se, do isteka ugovorenog perioda, u svim kantonalnim službama za zapošljavanje implementira Jedinstveni informacioni sistem u oblasti zapošljavanja. Za njegovo funkcionisanje u 2017. godini utrošena su sredstva u iznosu od 600.457 KM, od čega se 319.396 KM odnosi na troškove tekućeg održavanja licenci, a 281.061 KM na plaćene obaveze po ranije potpisanim ugovorima za uvođenje sistema, što nije u skladu s članom 4. Zakona o budžetima u FBiH u dijelu koji se odnosi na efikasno i ekonomično trošenje sredstava (tačka 8.1 Izvještaja);
3. Prilikom provođenja postupka javne nabavke radnih stanica – računara, laptopa i tableta u vrijednosti od 499.539 KM ne može se potvrditi da je osigurana pravična i aktivna konkurencija, u skladu sa Zakonom o javnim nabavkama (tačka 7. Izvještaja).

- **OBAVIJEST O NEPROVOĐENJU ISTRAGE od 25. 4. 2023. godine**

U skladu s članom 231. stav 4. Zakona o krivičnom postupku FBiH, Tužilaštvo je 25. 4. 2023. godine donijelo Naredbu da se istraga neće provoditi protiv [REDACTED], zbog krivičnog djela nesavjestan rad u službi iz člana 387. stav 1. KZ FBiH, jer iz prijave i pratećih spisa proizilazi da ne postoje osnovi sumnje da je prijavljena počinila krivično djelo.





**11. KANTONALNO JAVNO PREDUZEĆE ZA GOSPODARENJE DRŽAVNIM ŠUMAMA
„SARAJEVO-ŠUME“ D.O.O. SARAJEVO ZA 2017. GODINU**

Izveštaj o finansijskoj reviziji broj: 01-02-09-14-4-9-1368-6/17 od 14. 9. 2018. godine, dostavljen Tužilaštvu Kantona Sarajevo 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: S REZERVOM

Osnova za dato mišljenje

1. Struktura i iskazani iznos kapitala u poslovnim knjigama nije usklađen s kapitalom upisanim u sudski registar. Osnovni kapital u sudskom registru i u Statutu Društva iskazan je u iznosu od 10.000 KM, a u poslovnim knjigama, pored kapitala u navedenom iznosu, iskazan je i državni kapital u iznosu od 354.573.698 KM i dionički kapital u iznosu od 408.699 KM. Kapital i imovina precijenjeni su za navedene iznose, a finansijski izvještaji nisu sastavljeni u skladu sa Zakonom o računovodstvu i reviziji u FBiH, Međunarodnim računovodstvenim standardima i Međunarodnim standardima finansijskog izvještavanja (tačke 6.2.1 i 6.2.3 Izvještaja);
2. Društvo nema podatke, niti prati efekte troškova zaliha i njihovo učešće u cijeni koštanja pojedinih drvnih sortimenata. Ne utvrđuje se cijena koštanja drvnih sortimenata, jer uspostavljene evidencije ne daju stvarnu cijenu koštanja. Navedeno nije u skladu s Međunarodnim računovodstvenim standardom 2 – Zalihe (tačka 6.2.2 Izvještaja);
3. Ne može se potvrditi iskazani finansijski rezultat u iznosu od 232.918 KM jer su prihodi od prodaje drvnih sortimenata manje iskazani za 91.757 KM, a zalihe nisu vrednovane u skladu s Međunarodnim računovodstvenim standardom 2 – Zalihe. Efekte na finansijski rezultat nije moguće kvantificirati (tačke 6.1.1, 6.1.3 i 6.2.2 Izvještaja).

b) ZA USKLAĐENOST: NEGATIVNO

Osnova za dato mišljenje

1. Obaveze po osnovu naknada za korištenje šuma ne izmiruju se u propisanim rokovima, u skladu sa Zakonom o šumama Kantona Sarajevo. Neizmirene obaveze po ovom osnovu za period 2013–2017. godine iskazane su u iznosu od 1.375.543 KM (tačka 6.2.4 Izvještaja).
2. Postupci javnih nabavki nisu se provodili u skladu s članovima 15. i 23. Zakona o javnim nabavkama u dijelu pravilnog odabira postupka nabavke. Nabavke dodatnih usluga za rekonstrukciju i asfaltiranje puteva u iznosu od 230.154 KM provedene su pregovaračkim postupkom bez objave obavještenja, a da nisu ispunjeni uslovi za primjenu ovog postupka. Također, povedeno je više postupaka nabavki putem direktnih sporazuma za srodne predmete nabavke, za koje je trebalo provesti drugi odgovarajući postupak nabavke (tačka 7. Izvještaja);



3. Popis stalnih sredstava nije pravilno proveden, nije utvrđeno stvarno stanje, niti je izvršeno poređenje stanja utvrđenog popisom s knjigovodstvenim stanjem radi njihovog usklađivanja, kako je propisano članovima 25. i 28. Zakona o računovodstvu i reviziji u FBiH (tačka 6.2.4 Izvještaja).

- **OBAVIJEST O NEPROVOĐENJU ISTRAGE od 15. 9. 2023. godine**

Dana 14. 9. 2023. godine Kantonalno tužilaštvo Kantona Sarajevo donijelo je naredbu da se istraga neće provoditi. Nakon izvršene analize pribavljenih dokaza pojedinačno i u njihovoj međusobnoj vezi, utvrđeno je da se u prijavljenim radnjama nisu ostvarila obilježja krivičnog djela, već da prijavljene radnje eventualno ispunjavaju obilježja prekršaja iz Zakona o šumama Kantona Sarajevo i prekršaja iz Zakona o javnim nabavkama BiH.



12. UNIVERZITET U SARAJEVU ZA 2017. GODINU

Izvještaj o finansijskoj reviziji broj: 01-02-08-14-3-15-1668-5/17 od 5. 10. 2018. godine, dostavljen Tužilaštvu Kantona Sarajevo 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: **SUZDRŽANO**


Osnova za dato mišljenje

1. Sačinjeni finansijski izvještaji Univerziteta u Sarajevu ne odražavaju stvarno stanje s obzirom na to da njima nisu obuhvaćeni podaci za 23 fakulteta, dvije akademije i pet instituta koji su u sastavu Univerziteta u Sarajevu, što nije u skladu sa Zakonom o visokom obrazovanju i Zakonom o računovodstvu i reviziji u FBiH. Zbog značajnosti navedenog nismo imali pouzdanu osnovu da u potpunosti izrazimo mišljenje o finansijskim izvještajima Univerziteta u Sarajevu za 2017. godinu (tačka 6. Izvještaja).

b) ZA USKLAĐENOST: **NEGATIVNO**

Osnova za dato mišljenje

1. U skladu sa Zakonom o visokom obrazovanju na području Kantona Sarajevo, Univerzitet u Sarajevu je bio u obavezi da izvrši proces integracije. Univerzitet je započeo aktivnosti na provođenju procesa integracije, ali one nisu okončane do 31. 12. 2017. godine (tačka 5. Izvještaja);



2. Prilikom pripreme i izrade finansijskog plana, kao i izvještavanja Univerziteta u Sarajevu, nije se dosljedno pridržavalo odredbi Zakona o budžetima u FBiH i Pravilnika o finansijskom izvještavanju i godišnjem obračunu budžeta u FBiH. Finansijski plan nije usvojen za sva pravna lica koja u skladu sa članom 143. Zakona o visokom obrazovanju u Kantonu Sarajevo predstavljaju organizacione jedinice (tačka 6. Izvještaja);
3. Ne možemo potvrditi opravdanost zaključivanja ugovora o djelu na Ekonomskom, Filozofskom, Fakultetu sporta i tjelesnog odgoja, Poljoprivredno-prehrambenom i Veterinarskom fakultetu za obavljanje redovnih, sistematizovanih poslova koji se vrše u kontinuitetu tokom cijele godine, a posebno zaključivanja ugovora o djelu za izvođenje nastave. Navedeno nije u skladu sa Zakonom o radu i Zakonom o obligacionim odnosima. Za angažovanje nastavnog kadra i stručnih saradnika na osnovu ugovora o djelu za obavljanje redovnih poslova, obračun i uplata pripadajućih poreza i doprinosa nisu izvršeni u skladu sa Zakonom o porezu na dohodak i Zakonom o doprinosima (tačka 7.1.2.2 Izvještaja);
4. Ekonomski fakultet je u 2017. godini zaključivao ugovore o djelu sa zaposlenicima za poslove koji su najvećim dijelom utvrđeni Pravilnikom o unutrašnjoj organizaciji i organizaciji rada Ekonomskog fakulteta, koji predstavljaju redovne poslove zaposlenika u okviru radnih mjesta (tačka 7.1.2.2 Izvještaja);
5. Ekonomski fakultet je tokom 2017. godine imao dva kreditna zaduženja (jedan dugoročni i jedan kratkoročni kredit – overdraft), koja su realizovana na osnovu odluka dekana. Zakonom o visokom obrazovanju i Statutom Univerziteta u Sarajevu odobravanje kreditnog zaduženja nije dato u nadležnost dekanu (tačka 7.2.3 Izvještaja);
6. Popis imovine i obaveza Univerziteta u Sarajevu za 2017. godinu i usaglašavanje knjigovodstvenog sa stvarnim stanjem imovine i obaveza na 31. 12. 2017. nije izvršeno u skladu sa Zakonom o računovodstvu i reviziji u FBiH, Uredbom o računovodstvu budžeta u FBiH i Pravilnikom o knjigovodstvu budžeta u FBiH (tačka 7.2.4. Izvještaja).

- OBAVIJEST O NEPROVOĐENJU ISTRAGE od 11. 12. 2023. godine

Kantonalno tužilaštvo Kantona Sarajevo, na osnovu člana 231. stav 3. Zakona o krivičnom postupku Federacije Bosne i Hercegovine, donijelo je Naredbu da se istraga neće provoditi protiv ██████████, rektora Univerziteta u Sarajevu zbog krivičnog djela Nesavjestan rad u službi iz člana 387. stav 1. Krivičnog zakona Federacije Bosne i Hercegovine, te protiv ██████████, dekana Poljoprivredno-prehrambenog fakulteta, ██████████, dekana Fakulteta sporta i tjelesnog odgoja, ██████████, dekana Filozofskog fakulteta, ██████████, dekana Veterinarskog fakulteta, i ██████████, dekana Ekonomskog fakulteta zbog krivičnog djela zloupotreba položaja ili ovlaštenja iz člana 383. stav 1 KZ FBiH jer je iz prijave i pratećih spisa očigledno da prijavljena djela nisu krivična djela.



**13. JAVNA USTANOVA „STUDENSKI CENTAR“ SARAJEVO ZA 2017. GODINU**

Izvještaj o finansijskoj reviziji broj: 08-14-3-9-1507-5/17 od 4. 10. 2018. godine, dostavljen Tužilaštvu Kantona Sarajevo 26. 12. 2018. godine, u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA**a) ZA FINANSIJSKE IZVJEŠTAJE: S REZERVOM****Osnova za dato mišljenje**

1. Potraživanja starija od 12 mjeseci u iznosu od 236.869 KM nisu vrijednosno usklađena, odnosno ispravljena na teret rashoda, što je imalo za posljedicu da su rashodi potcijenjeni, a potraživanja i finansijski rezultat precijenjeni za navedeni iznos (tačka 6.2.2.3 Izvještaja);
2. Na dan bilansa nije vršena procjena umanjena vrijednosti nekretnina, postrojenja i opreme, odnosno procjena nadoknadive vrijednosti sredstava u skladu sa zahtjevima MRS-a 36 – Umanjenje imovine. Posljedica navedenog je da se knjigovodstvena vrijednost nekretnina, postrojenja i opreme može značajno razlikovati od one koja bi se utvrdila prema zahtjevima Standarda (tačka 6.2.1 Izvještaja).


b) ZA USKLAĐENOST: S REZERVOM**Osnova za dato mišljenje**

1. Ne može se potvrditi osnovanost angažovanja fizičkih lica (studentata) za obavljanje redovnih poslova Studentskog centra utvrđenih Pravilnikom o radu sa organizacijom, sistematizacijom radnih mjesta, plaćama i drugim naknadama radnika (tačka 6.1.2.1 Izvještaja).
2. Studentski centar na 31. 12. 2017. godine ima neizmirene obaveze za pripadajuće poreze i doprinose za plaće zaposlenika iz ranijeg perioda u iznosu od 4.785.076 KM, što nije u skladu sa Zakonom o doprinosima i Zakonom o porezu na dohodak (tačka 6.2.5.1 Izvještaja).

- OBAVIJEST O NEPROVOĐENJU ISTRAGE od 21. 11. 2023. godine

Tužilaštvo je u predmetu broj T09 0 KTPO 0131472 22, na osnovu člana 45. stav 2. tačka e) i 231. stav 3. Zakona o krivičnom postupku Federacije Bosne i Hercegovine donijelo naredbu o neprovođenju istrage protiv ██████████, zbog krivičnog djela zloupotreba službenog položaja ili ovlaštenja iz člana 383. stav 1. KZ FBiH, **jer postoje druge okolnosti koje isključuju krivično gonjenje**, i protiv ██████████ zbog krivičnog djela zloupotreba službenog položaja ili ovlaštenja iz člana 383. stav 1. KZ FBiH, **jer prijavljeno djelo nije krivično djelo**.





B. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU HERCEGOVAČKO-NERETVANSKOG KANTONA

Za 21 izvještaj finansijske revizije koji je Ured za reviziju dostavio Kantonalnom tužilaštvu Hercegovačko-neretvanskog kantona po osnovu člana 16. i/ili 19. Zakona o reviziji, do dana sastavljanja publikacije tužilaštvo nije dostavilo nijedan odgovor.

C. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU ZENIČKO-DOBOJSKOG KANTONA

Za četiri izvještaja finansijske revizije koje je Ured za reviziju dostavio Kantonalnom tužilaštvu Zeničko-dobojskog kantona po osnovu člana 16. i/ili 19. Zakona o reviziji, tužilaštvo je dostavilo sljedeće odgovore:

- za jedan izvještaj obavijest o obustavi istrage;
- za tri izvještaja obavijest da su formirani predmeti i da su u fazi provođenja istražnih radnji.

U nastavku je pregled izvještaja za koji je dostavljena obavijest o obustavi istrage.

1. JAVNA USTANOVA KANTONALNA BOLNICA ZENICA ZA 2021. GODINU

Izvještaj o finansijskoj reviziji broj: 01-02-08-11-3-2895-7/21 od 26. 9. 2022. godine, dostavljen Tužilaštvu Zeničko-dobojskog kantona 26. 10. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Priznavanje prihoda po osnovu donacija od Vlade Zeničko-dobojskog kantona u iznosu od 1.073.479 KM nije izvršeno na osnovu direktne povezanosti između nastalih troškova i ostvarenih prihoda, što nije u skladu s Konceptualnim okvirom za finansijsko izvještavanje. Navedeno je imalo za posljedicu da su prihodi i finansijski rezultat precijenjeni (tačka 6.1.1.1 Izvještaja);
2. Prilikom sastavljanja godišnjih finansijskih izvještaja Uprava Ustanove nije izvršila procjenu, niti objavila značajnu neizvjesnost u vezi stalnosti poslovanja, odnosno nije postupila u skladu s tačkom 25. MRS-a 1 – Presentacija finansijskih izvještaja. Na 31. 12. 2021. godine akumulirani gubitak do visine kapitala iz ranijeg perioda iznosio je 12.133.294 KM, ukupne obaveze 20.439.346 KM, od čega se na kratkoročne obaveze odnosi 17.772.679 KM, dok je tekuća imovina iznosila 12.482.807 KM.




- Navedeno ukazuje na to da Ustanova tekućim sredstvima nije u mogućnosti blagovremeno izmirivati dospjele obaveze. Ove okolnosti stvaraju sumnju u sposobnost Ustanove da nastavi s vremenski neograničenim poslovanjem, što nije objavljeno u finansijskim izvještajima (tačka 6.1.3 i tačka 6.5 Izvještaja);
3. Zalihe sirovina i materijala u ukupnom iznosu od 3.615.931 KM nisu iskazane u skladu sa zahtjevima paragrafa 9. MRS-a 2 – Zalihe. Ustanova ne prati ročnu strukturu svih zaliha, niti utvrđuje neto nadoknadivu vrijednost na datum bilansa, radi pravilnog mjerenja vrijednosti zaliha u skladu sa zahtjevima standarda. Efekte na finansijske izvještaje nije moguće kvantificirati (tačka 6.2.2.1 Izvještaja);
 4. Stalna sredstva su precijenjena za 980.000 KM, što se odnosi na sadašnju vrijednost građevinskih objekata koje Ustanova ne koristi i za koje nema pravo korištenja. Navedeno nije u skladu sa Zakonom o računovodstvu i reviziju u FBiH i zahtjevima Konceptualnog okvira za finansijsko izvještavanje (tačka 6.2.1 Izvještaja);
 5. U okviru građevinskih objekata iskazan je iznos od 90.018 KM sadašnje vrijednosti (stan) koji datira iz ranijeg perioda, za koji nije prezentirana dokumentacija na osnovu koje je izvršeno knjigovodstveno evidentiranje, što nije u skladu s članom 11. Zakona o računovodstvu i reviziji u FBiH. Za navedeni iznos ne možemo potvrditi vrijednost iskazanih stalnih sredstava na datum bilansa (tačka 6.2.1 Izvještaja).

b) ZA USKLAĐENOST: S REZERVOM

Osnova za dato mišljenje

1. Ustanova je obračunala i isplatila naknadu za regres u iznosu od 725.783 KM, iako je poslovala s gubitkom u prethodnoj godini, što nije u skladu s odredbama Kolektivnog ugovora o pravima i obavezama poslodavaca i radnika u zdravstvu na području Zeničko-dobojskog kantona, Kolektivnog ugovora o pravima i obavezama poslodavaca i radnika u djelatnosti doktora medicine i stomatologije na području Zeničko-dobojskog kantona i Pravilnika o radu Ustanove (tačka 6.1.2.1 Izvještaja);
2. Plan javnih nabavki Ustanove za 2021. godinu nije sačinjen u skladu sa stvarnim potrebama, što je imalo za posljedicu neefikasno provođenje i dijeljenje postupaka. Navedeno nije u skladu s članovima 3. i 15. Zakona o javnim nabavkama (tačka 7. Izvještaja);
3. Popis imovine i obaveza (građevinskih objekata, potraživanja od kupaca, drugih kratkoročnih potraživanja, obaveza prema dobavljačima, pasivnih vremenskih razgraničenja i tuđe robe) i usaglašavanje knjigovodstvenog sa stvarnim stanjem imovine i obaveza nije izvršeno u skladu sa Zakonom o računovodstvu i reviziji u FBiH (tačka 6.2.7 Izvještaja).



- **OBAVIJEST O OBUSTAVI ISTRAGE od 27. 3. 2023. godine**

Kantonalno tužilaštvo je, shodno odredbama člana 239. stav 1. tačka c) ZKP FBiH, 27. 3. 2023. godine donijelo Naredbu o obustavi istrage protiv [REDACTED], jer ne postoji dovoljno dokaza da su osumnjičeni počinili krivično djelo nesavjestan rad u službi iz člana 387. stav 2. u vezi sa stavom 1. KZ FBiH, opisano u Naredbi o provođenju istrage od 31. 1. 2023. godine.



D. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU UNSKO-SANSKOG KANTONA

Za pet izvještaja finansijske revizije koji su dostavljeni Kantonalnom tužilaštvu Unsko-sanskog kantona po osnovu člana 16. i/ili 19. Zakona o reviziji, tužilaštvo je dostavilo sljedeće odgovore:

- za dva izvještaja obavijest o neprovođenju istrage,
- za jedan izvještaj obavijest o obustavi istrage,
- za dva izvještaja informaciju da se predmeti nalaze u fazi prijave.

U nastavku je pregled izvještaja za koje su dostavljene obavijesti o neprovođenju/obustavi istrage.

1. ŠUMSKOPRIVREDNO DRUŠTVO „UNSKO-SANSKE ŠUME“ D.O.O. BOSANSKA KRUPA ZA 2020. GODINU

Izvještaj o finansijskoj reviziji broj: 01-02-09-11-4-2049-7/20 od 20. 9. 2021. godine, dostavljen Tužilaštvu Unsko-sanskog kantona 7. 12. 2021. godine u skladu s članom 19. Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: S REZERVOM

Osnova za dato mišljenje

1. Ne možemo potvrditi strukturu i visinu iskazanog kapitala jer je Društvo u 2010. godini iznos od 10.539.043 KM bez dokumentacione osnove preknjižilo sa pozicije osnovnog kapitala na poziciju zakonske rezerve, s ciljem usklađivanja sa kapitalom u sudskom registru. To nije u skladu sa Konceptualnim okvirom za finansijsko izvještavanje (tačka 7.2.3 Izvještaja).

b) ZA USKLAĐENOST: S REZERVOM**Osnova za dato mišljenje**

1. Prijem u radni odnos za veći broj novozaposlenih nije vršen u skladu sa Zakonom o radu, koji nalaže obavezno provođenje procedure javnog oglašavanja, već su primjenjivana izuzeća za 171 zaposlenika, shodno Uredbi o postupku prijema u radni odnos. Na ovaj način nije ispoštovana transparentnost kod zapošljavanja, niti rok utvrđen Uredbom, jer je Društvo zaključivalo nove ugovore sa pojedinim zaposlenicima na određeno i na neodređeno (tačka 4. Izvještaja);
2. Nabavke usluga sječe i izvoza šume u iznosu od najmanje 881.624 KM nisu obuhvaćene Planom javnih nabavki niti posebnim odlukama, što nije u skladu sa članom 17. Zakona o javnim nabavkama. Također, tenderska dokumentacija za postupak nabavke motornog vozila s prikolicom i dizalicom u iznosu od 359.600 KM nije sačinjena u skladu s članom 53. Zakona o javnim nabavkama, u cilju jednakog tretmana i nediskriminacije potencijalnih ponuđača (tačka 8. Izvještaja).

- **OBAVIJEST O NEPROVOĐENJU ISTRAGE od 6. 6. 2023. godine**

Na osnovu člana 45. stav 2. tačka e) i člana 231. stav 3. Zakona o krivičnom postupku Federacije Bosne i Hercegovine, Tužilaštvo donosi naredbu i obavještava da se neće provoditi istraga u krivičnom predmetu, jer je iz prijave i pratećih spisa očigledno da prijavljeno djelo nije krivično djelo.

**2. OPĆINA SANSKI MOST ZA 2020. GODINU**

Izvještaj o finansijskoj reviziji broj: 01-02-07-11-2-2624-5/20 od 30. 9. 2021. godine, dostavljen Tužilaštvu Unsko-sanskog kantona 1. 12. 2021. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA**a) ZA FINANSIJSKE IZVJEŠTAJE: NEGATIVNO****Osnova za dato mišljenje**

1. Finansijski rezultat za 2020. godinu u Godišnjem izvještaju o izvršenju budžeta više je iskazan za iznos od najmanje 469.388 KM, jer ne sadrži tačan podatak o primljenim kapitalnim transferima i donacijama. Također, ne možemo potvrditi neraspoređeni višak prihoda nad rashodima u iznosu od najmanje 509.870 KM, jer nije prezentovana dokumentacija na osnovu koje je izvršeno knjigovodstveno evidentiranje, te zbog činjenice da su u ranijim periodima neutrošeni namjenski prihodi priznavani kao prihod.



- Navedeno nije u skladu s odredbama Zakona o budžetima u FBiH, Uredbe o računovodstvu budžeta u FBiH i Pravilnika o knjigovodstvu budžeta u FBiH (tačke 6.1.3, 6.1.1.3 Izvještaja);
2. Kratkoročne tekuće obaveze manje su iskazane za 418.090 KM s obzirom na to da obaveze i rashodi po osnovu sudskih rješenja o izvršenju ranijih i tekuće godine nisu knjigovodstveno evidentirani. Zbog toga su potcijenjeni rashodi i precijenjen je finansijski rezultat za 2020. godinu za 30.713 KM, kao i rashodi i finansijski rezultati ranijih godina, što nije u skladu sa Zakonom o budžetima u FBiH (tačka 6.2.3 Izvještaja);
 3. Ne možemo potvrditi dugoročne plasmane koji se odnose na dionice javnih preduzeća u iznosu od 892.779 KM s obzirom na to da nije prezentovana dokumentacija na osnovu koje je izvršeno knjigovodstveno evidentiranje, kao ni dokumentacija o poduzetim aktivnostima nakon donošenja Odluke Općinskog vijeća o pokretanju postupka prodaje dionica u vlasništvu Općine iz 2010. godine. Navedeno nije u skladu s odredbama Zakona o računovodstvu i reviziji u FBiH i Pravilnika o knjigovodstvu budžeta u FBiH (tačka 6.2.2 Izvještaja);
 4. Potraživanja za komunalnu naknadu nisu knjigovodstveno evidentirana, što je imalo za posljedicu da su kratkoročna potraživanja i kratkoročna razgraničenja u Bilansu stanja potcijenjena za najmanje za 342.178 KM. Navedeno nije u skladu sa Zakonom o budžetima u FBiH, Uredbom o računovodstvu budžeta u FBiH i Pravilnikom o knjigovodstvu budžeta u FBiH (tačka 6.2.1 Izvještaja);
 5. Dugoročne obaveze i povezana potraživanja po osnovu ugovora o kreditu za sanaciju komunalne infrastrukture u iznosu od 1.274.476 KM nisu knjigovodstveno evidentirana, zbog čega Bilans stanja ne daje tačan podatak o stanju dugoročnih obaveza i izvora sredstava. To nije u skladu sa Uredbom o računovodstvu budžeta u FBiH i Pravilnikom o knjigovodstvu budžeta u FBiH (tačka 6.2.4 Izvještaja).

b) ZA USKLAĐENOST: S REZERVOM

Osnova za dato mišljenje

1. Nije proveden cjelovit popis stalnih sredstava i obaveza, niti je izvršeno usaglašavanje stvarnog stanja utvrđenog popisom sa knjigovodstvenim stanjem, kako je to propisano odredbama Zakona o računovodstvu i reviziji u FBiH, Uredbe o računovodstvu budžeta u FBiH i Pravilnika o knjigovodstvu budžeta u FBiH (tačka 6.2.6 Izvještaja).

- OBAVIJEST O NEPOROVOĐENJU ISTRAGE od 23. 5. 2023. godine

U krivičnom predmetu broj T01 0 KTAPO 0039600 21 neće se provoditi istraga povodom Izvještaja o finansijskoj reviziji Općine Sanski Most za 2020. godinu, jer je iz prijave i pratećih spisa očigledno da prijavljeno djelo nije krivično djelo.





3. ZAVOD ZDRAVSTVENOG OSIGURANJA UNSKO-SANSKOG KANTONA ZA 2017. GODINU

Izveštaj o finansijskoj reviziji broj: 01-02-08-14-3-6-1375-5/17 od 5. 9. 2018. godine, dostavljen Tužilaštvu Unsko-sanskog kantona 26. 12. 2018. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: **POZITIVNO**

b) ZA USKLAĐENOST: **S REZERVOM**

Osnova za dato mišljenje

1. Nabavka medicinskog materijala u iznosu od 644.026 KM vršena je bez provođenja procedura javnih nabavki, što je obaveza u skladu sa Zakonom o javnim nabavkama. Također, nabavka trakica za mjerenje šećera u krvi u iznosu od 738.328 KM, za koju nije okončana procedura javnih nabavki do kraja 2017. godine, vršena je na osnovu aneksa osnovnog ugovora iz 2013. godine, što nije u skladu sa odredbama navedenog Zakona (tačka 8. Izvještaja);
2. Isplate razlika plaća zaposlenicima za mart i septembar 2017. godine izvršene su u ukupnom iznosu od 96.296 KM (bruto). Ne možemo potvrditi opravdanost navedenih isplata jer nisu u skladu s članom 51. Pravilnika o plaćama, naknadama plaća i drugim materijalnim pravima radnika Zavoda zdravstvenog osiguranja Unsko-sanskog kantona (tačka 6.1.2.1 Izvještaja);
3. Popis obaveza i potraživanja nije izvršen u skladu s odredbama Zakona o računovodstvu i reviziji u FBiH i Uredbe o računovodstvu budžeta u FBiH (tačka 6.2.4 Izvještaja).

- **OBAVIJEST O OBUSTAVI ISTRAGE od 14. 4. 2023. godine**

Na osnovu izvještaja i dokumentacije koju je tužilac pribavio prije dostavljanja izvještaja otvorena je istraga protiv [REDACTED] i [REDACTED] zbog krivičnog djela sklapanje štetnog ugovora iz člana 252. stav 2. KZ FBiH. Nakon provedene istrage postupajući tužilac je 13. 2. 2019. godine donio Naredbu o obustavi istrage nalazeći da nema dovoljno dokaza da su osumnjičena lica počinila predmetno niti drugo krivično djelo.





E. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU TUZLANSKOG KANTONA

Za pet izvještaja finansijske revizije koji su dostavljeni Kantonalnom tužilaštvu Tuzlanskog kantona po osnovu člana 16. i/ili 19. Zakona o reviziji, tužilaštvo je za jedan izvještaj dostavilo obavijest o neprovođenju istrage, a za četiri izvještaja do dana sastavljanja ove publikacije tužilaštvo nije dostavilo odgovor.

U nastavku je pregled izvještaja finansijske revizije za koji je dostavljena obavijest o neprovođenju istrage.

1. JAVNO PREDUZEĆE „MEĐUNARODNI AERODROM TUZLA“ D.O.O. ŽIVINICE ZA 2021. GODINU

Izvještaj o finansijskoj reviziji broj: 01-02-09-11-4-3042-7/21 od 1. 9. 2022. godine, dostavljen Tužilaštvu Tuzlanskog kantona 1. 11. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Na poziciji materijalnih sredstava u pripremi iskazani su putnički terminali Faza I i Faza II u iznosu od 5.342.631 KM koji su stavljeni u funkciju, ali Društvo nije aktiviralo investiciju u skladu sa zahtjevima MRS-a 16 – Nekretnine, postrojenja i oprema. Navedeno ima za posljedicu da su rashodi i finansijski rezultat potcijenjeni jer nije obračunata amortizacija za sredstva koja su u funkciji i od kojih se ostvaruju ekonomske koristi (tačka 6.2.1 Izvještaja);
2. Na datum bilansa nije izvršena ocjena postoje li bilo kakvi pokazatelji umanjenja vrijednosti materijalnih sredstava u pripremi iskazanih u iznosu od 6.711.968 KM, niti je vršena procjena nadoknadive vrijednosti za takva sredstva shodno MRS-u 36 – Umanjenje vrijednosti imovine, i odredbama Zakona o računovodstvu i reviziji u FBiH. To može imati za posljedicu da se knjigovodstvena vrijednost materijalnih sredstava u pripremi može razlikovati od one koja bi se utvrdila prema zahtjevima Zakona i MRS-a 36 (tačka 6.2.1 Izvještaja);
3. Imovina Društva je potcijenjena za 2.080.322 KM jer u finansijskim izvještajima nisu iskazane nekretnine koje su Društvu prilikom osnivanja dodijeljene i navedene u Statutu, i to objekat putničkog terminala, portirnica sa nadstrešnicom i parking za automobile, što nije u skladu sa MRS-om 16 – Nekretnine, postrojenja i oprema i Zakonom o računovodstvu i reviziji u FBiH (tačka 6.2.1 Izvještaja);



4. Prilikom sastavljanja godišnjih finansijskih izvještaja Uprava Društva nije izvršila procjenu sposobnosti subjekta da nastavi poslovati u vremenski neograničenom periodu u skladu s tačkom 25. MRS-a 1 – Presentacija finansijskih izvještaja. Akumulirani gubitak prethodnih godina iskazan je u iznosu od 3.462.650 KM, što sa iskazanim gubitkom izvještajne godine od 1.564.194 KM premašuje ukupan kapital Društva za 966.744 KM. Društvo najveći dio svog poslovanja obavlja samo sa jednim kupcem i značajnim dijelom se finansira od viših nivoa vlasti. Ove okolnosti stvaraju sumnju u sposobnost Društva da nastavi s vremenski neograničenim poslovanjem (tačka 6.5 Izvještaja);
5. Za potraživanja starija od godinu dana u iznosu od najmanje 154.241 KM nije izvršena procjena očekivanih kreditnih gubitaka u skladu sa zahtjevima MSFI-ja 9 – Finansijski instrumenti. To za posljedicu može imati da su rashodi potcijenjeni, a imovina (potraživanja) i finansijski rezultat precijenjeni za navedeni iznos (tačka 6.2.2.3 Izvještaja).

b) ZA USKLAĐENOST: NEGATIVNO

Osnova za dato mišljenje

1. Prijem u radni odnos na određeno vrijeme provodio se bez javnog oglašavanja, što nije u skladu sa Zakonom o radu, a prilikom primjene izuzeća u zapošljavanju zaključivani su ugovori o radu na period do 12 mjeseci, bez provođenja postupka javnog oglašavanja, u vrijeme kada nije bilo proglašeno stanje prirodne ili druge nesreće ili epidemije zarazne bolesti, što nije u skladu s Uredbom o postupku prijema u radni odnos u javnom sektoru u Tuzlanskom kantonu (tačka 4. Izvještaja);
2. Društvo nije dostavilo trogodišnji plan poslovanja Uredu za reviziju institucija u FBiH u skladu s odredbama člana 22. Zakona o javnim preduzećima u FBiH (tačka 5. Izvještaja);
3. Ne možemo potvrditi namjenski utrošak donacija koje su primljene u periodu od 2008. do 2021. godine, u iznosu od najmanje 777.782 KM, jer je na 31. 12. 2021. godine Društvo evidentiralo neutrošeni iznos od 2.738.742 KM koji je dobilo za potrebe ulaganja u stalna sredstva, a ukupan iznos novčanih sredstava u domaćoj valuti iznosi 1.960.960 KM, što nije u skladu s odlukama i sporazumima kojima su utvrđene namjene utroška sredstava (tačka 6.2.4 Izvještaja);
4. Prilikom godišnjeg popisa imovine i obaveza nije izvršena analiza statusa materijalnih sredstava u pripremi i vlasništva nad imovinom, te nije utvrđeno stvarno stanje potraživanja i obaveza, što nije u skladu sa Zakonom o računovodstvu i reviziji u FBiH (tačka 6.2.6 Izvještaja);
5. Kod provođenja postupaka javnih nabavki roba, usluga i radova u iznosu od najmanje 362.629 KM Društvo je zaključivalo ugovore po cijenama znatno većim od osiguranih sredstava, provodilo postupke u većim iznosima od onih procijenjenih planom javnih nabavki, te nije sačinjavalo tendersku dokumentaciju u skladu sa Zakonom o javnim nabavkama BiH (tačka 7. Izvještaja).



- **OBAVIJEST O NEPROVOĐENJU ISTRAGE od 22. 2. 2024. godine**

Tužilaštvo je donijelo naredbu o neprovođenju istrage zbog prijavljenih radnji za koje se smatra da nisu obilježja krivičnog djela zloupotreba položaja ili ovlaštenja iz člana 383. stav 1. KZ FBiH, jer ne postoje činjenice i okolnosti koje ukazuju na postojanje umišljaja da protivpravnim radnjama pribave korist sebi ili drugom. Činjenice i okolnosti nalažu da ne postoje indicije da je pribavljena korist drugom ili nanesena šteta Međunarodnom aerodromu.



F. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU SREDNJOBOSANSKOG KANTONA

Za pet izvještaja finansijske revizije koji su dostavljeni Kantonalnom tužilaštvu Srednjobosanskog kantona po osnovu člana 16. i/ili 19. Zakona o reviziji, tužilaštvo je dostavilo odgovore kako slijedi:

- za jedan izvještaj obavijest o neprovođenju istrage;
- za tri izvještaja informaciju da se predmeti nalaze u radu;
- za jedan izvještaj informaciju da je podignuta optužnica i proslijeđena na potvrđivanje Kantonalnom sudu u Novom Travniku.

U nastavku je pregled izvještaja za koje su dostavljene obavijesti o neprovođenju istrage.

1. JAVNO KOMUNALNO PREDUZEĆE „VITKOM“ D.O.O. VITEZ ZA 2020. GODINU

Izvještaj o finansijskoj reviziji broj: 01-02-09-11-4-2044-7/20 od 24. 6. 2021. godine, dostavljen Tužilaštvu Srednjobosanskog kantona 6. 12. 2021. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Za potraživanja starija od godinu dana u iznosu od najmanje 1.075.081 KM Društvo nije izvršilo procjenu očekivanih kreditnih gubitaka u skladu sa zahtjevima MSFI-ja 9 – Finansijski instrumenti. To za posljedicu može imati da su rashodi potcijenjeni, a imovina (potraživanja) i finansijski rezultat precijenjeni za navedeni iznos (tačka 7.2.2.3 Izvještaja);



2. Iskazani osnovni kapital u iznosu od 2.636.111 KM ne može se potvrditi jer nije prezentirana relevantna dokumentacija na osnovu koje bi se potvrdio osnov evidentiranja na toj bilansnoj poziciji, što je imalo uticaja na neslaganje iskazanog osnovnog kapitala Društva u poslovnim knjigama i upisanog kapitala u sudskom registru (tačka 7.2.3 Izvještaja);
3. Društvo nije izvršilo rezervisanja za sudske sporove u ukupnom iznosu od 69.347 KM u skladu sa zahtjevima MRS-a 37 – Rezervisanja, potencijalne obaveze i potencijalna sredstva. To za posljedicu ima da su rashodi i obaveze potcijenjeni, a finansijski rezultat precijenjen (tačka 9. Izvještaja);
4. Društvo nije izvršilo ispravke grešaka iz prethodnih perioda u skladu sa zahtjevima MRS-a 8 – Računovodstvene politike, promjene računovodstvenih procjena i greške, iskazanih na poziciji prihoda u iznosu od 93.232 KM i rashoda u iznosu od 221.167 KM, a čiji su efekti trebali biti iskazani retroaktivno, kroz ispravku početnih stanja imovine, obaveza i kapitala (tačke 4, 7.1.1.2 i 7.1.2.4 Izvještaja).

b) ZA USKLAĐENOST: **NEGATIVNO**


Osnova za dato mišljenje

1. Društvo za isplaćene plaće ne uplaćuje obaveze po osnovu doprinosa za penziona i invalidsko osiguranje, zdravstvo i nezaposlenost, koje na 31. 12. 2020. godine iznose 1.312.082 KM, od čega se na obaveze iz 2020. godine odnosi 448.653 KM. To nije u skladu sa Zakonom o doprinosima (tačka 7.2.4.2 Izvještaja);
2. Godišnji popis imovine i obaveza nije izvršen u skladu sa Zakonom o računovodstvu i reviziji u FBiH, jer nije izvršen popis zemljišta i građevinskih objekata koji su iskazani u finansijskim izvještajima, nisu usaglašena novčana sredstva i nije izvršen popis imovine, potraživanja i obaveza iskazanih u vanbilansnoj evidenciji Društva (tačka 7.2.5 Izvještaja);
3. Organi upravljanja nisu poduzeli odgovarajuće aktivnosti kako bi Društvo zaštitili od negativnih ekonomskih posljedica gubitaka vode, za koje smo utvrdili da iznose cca 79%, a koji ukazuju na bespravne priključke, potrebu sanacije vodovodne infrastrukture i potrebu uvođenja u sistem javnog vodosnabdijevanja svih pravnih lica na području Općine Vitez. Navedeno nije u skladu sa Zakonom o privrednim društvima, prema kojem su u obavezi da poslove obavljaju savjesno, s pažnjom dobrog privrednika i u razumnom uvjerenju da djeluju u najboljem interesu Društva (tačka 7.1.1.1 Izvještaja).

- **OBAVIJEST O NEPROVOĐENJU ISTRAGE od 5. 10. 2023. godine**

Dopisom od 30. 1. 2024. godine Tužilaštvo je obavijestilo Ured za reviziju da je za Javno komunalno preduzeće „Vitkom“ d.o.o. Vitez donesena naredba o neprovođenju istrage 5. 10. 2023. godine.





G. IZVJEŠTAJI O FINANSIJSKOJ REVIZIJI DOSTAVLJENI KANTONALNOM TUŽILAŠTVU KANTONA 10 LIVNO

Za šest izvještaja finansijske revizije koji su, po osnovu člana 16. i/ili 19. Zakona o reviziji, dostavljeni Kantonalnom tužilaštvu Kantona, tužilaštvo je dostavilo sljedeće odgovore:

- za tri izvještaja obavijest o neprovođenju istrage;
- za tri izvještaja informaciju da se predmeti nalaze u fazi navoda.

U nastavku je pregled izvještaja za koje su dostavljene obavijesti o neprovođenju istrage.

1. OPĆINA TOMISLAVGRAD ZA 2021. GODINU

Izvještaj o finansijskoj reviziji broj: 01-02-07-11-2-2776-7/21 od 7. 9. 2022. godine, dostavljen Tužilaštvu Kantona 10 Livno 26. 10. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Neraspoređeni višak prihoda nad rashodima u Bilansu stanja precijenjen je za najmanje 1.857.350 KM s obzirom na to da dio rashoda i izdataka nije priznat u periodu na koji se odnosi, da su namjenski prihodi ranijih perioda priznati, iako nisu utrošeni, te da knjigovodstveno evidentiranje prodaje zemljišta nije provedeno u skladu s odredbama Pravilnika o knjigovodstvu budžeta u FBiH i Računovodstvenim politikama za federalne budžetske korisnike i Trezor (tačke 6.1.1.2, 6.1.1.4 i 6.1.3);
2. Kratkoročna potraživanja u Bilansu stanja manje su iskazana za 117.485 KM s obzirom na to da su njihov saldo umanjile pretplate u navedenom iznosu. Nismo potvrdili ni potraživanja i plasmane u iznosu od najmanje 601.127 KM, a potraživanja po osnovu komunalne naknade nisu knjigovodstveno evidentirana. Zbog navedenog Bilans stanja ne daje tačan prikaz kratkoročnih potraživanja i razgraničenja, a efekte ne možemo mjeriti (tačka 6.2.1);
3. Za zemljište iskazane vrijednosti od 6.526.634 KM nije prezentirana struktura, nismo se uvjerali da je prodato zemljište prvobitno bilo knjigovodstveno evidentirano, niti da je ova poslovna promjena provedena u skladu s računovodstvenim politikama koje su u primjeni. Za dio stalnih sredstava u pripremi nije prezentirana dokumentacija koja potvrđuje da li su u upotrebi, a obračun amortizacije vrši se samo za stalna sredstva evidentirana u knjizi kapitalne imovine koja ne sadrži sva stalna sredstva iskazana u Glavnoj knjizi. Zbog navedenog, ne možemo potvrditi stalna sredstva i izvore sredstava iskazane u Bilansu stanja (tačka 6.2.2);



4. Dugoročne obaveze po Ugovoru o kreditu za sanaciju komunalne infrastrukture, koje na 31. 12. 2021. godine iznose 262.529 KM, nisu knjigovodstveno evidentirane, zbog čega Bilans stanja ne daje tačan pregled dugoročnih obaveza i izvora sredstava, što nije u skladu s Uredbom o računovodstvu budžeta u FBiH i Pravilnikom o knjigovodstvu budžeta u FBiH (tačka 6.2.4 Izvještaja)

b) ZA USKLAĐENOST: S REZERVOM


Osnova za dato mišljenje

1. Nije donesen dokument okvirnog budžeta za period 2021–2023. godine, nisu se sačinjavali planovi novčanih tokova i operativni planovi, što nije u skladu s odredbama Zakona o budžetima u FBiH (tačka 5. Izvještaja);
2. Popis imovine i obaveze nije blagovremeno pokrenut, a nije popisana ni cjelokupna imovina i obaveze Općine i ostalih budžetskih korisnika. Nije izvršeno usklađivanje knjigovodstvenog sa stvarnim stanjem, a ni izvještaj o izvršenom popisu imovine i obaveza Općine nije usvojen u zakonom propisanom roku. Navedeno nije u skladu sa Zakonom o računovodstvu i reviziji u FBiH (tačka 6.2.6 Izvještaja);
3. Za nabavke roba i usluga u iznosu od najmanje 121.392 KM nisu provedeni postupci. Procijenjena vrijednost nabavke izgradnje kanalizacione mreže nije utvrđena na način da čini njenu procijenjenu tržišnu vrijednost, a postupak nije poništen iako je prihvaćena ponuda bila 198.148 KM ili 57% veća od osiguranih sredstava za ovu nabavku. Kod nabavki izvođenja radova rehabilitacije lokalnih cesta i izgradnje kanalizacione infrastrukture nisu poštovani rokovi uvođenja u posao i izvođenja radova. Navedeno nije u skladu s odredbama Zakona o javnim nabavkama i zaključenih ugovora (tačka 8. Izvještaja).

- OBAVIJEST O NEPROVOĐENJU ISTRAGE od 31. 5. 2023. godine

Tužilaštvo je u predmetu koji je formiran na osnovu negativnog revizorskog izvještaja za Općinu Tomislavgrad donijelo Naredbu da se istraga neće provoditi 31. 5. 2023. godine, **jer je iz prijave i pratećih spisa očigledno da prijavljeno djelo nije kazneno djelo.**





2. OPŠTINA BOSANSKO GRAHOVO ZA 2021. GODINU

Izvještaj o finansijskoj reviziji broj: 01-02-07-11-2-3508-6/21 od 7. 9. 2022. godine, dostavljen Tužilaštvu Kantona 10 Livno 26. 10. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: NEGATIVNO

Osnova za dato mišljenje

1. Neraspoređeni višak prihoda nad rashodima u Bilansu stanja više je iskazan za 614.465 KM jer zatvaranje konta i utvrđivanje rezultata nije provedeno na način propisan Pravilnikom o knjigovodstvu budžeta u FBiH (tačka 6.1.3 Izvještaja);
2. Obaveze po osnovu ugovora o kreditima za finansiranje projekata „Poboljšanje sistema vodoopskrbe pitkom vodom“ i „Urbana infrastruktura i pružanje usluga“, koje na 31. 12. 2021. godine iznose 1.361.395 KM, nisu knjigovodstveno evidentirane. Zbog toga Bilans stanja ne daje tačan pregled dugoročnih obaveza i izvora sredstava, što nije u skladu s Pravilnikom o knjigovodstvu budžeta u FBiH (tačka 6.2.4 Izvještaja);
1. Ne možemo potvrditi potraživanja koja su iskazana u iznosu od 415.599 KM s obzirom na to da se ne vode ažurne pomoćne evidencije, niti su poduzimane sve zakonom predviđene mjere s ciljem njihove naplate, kako je propisano Zakonom o budžetima u FBiH. S kupcima nisu provedena usaglašavanja iskazanih potraživanja slanjem izvoda otvorenih stavki, kako je predviđeno Zakonom o računovodstvu i reviziji u FBiH, a dio potraživanja neutemeljeno je iskazan. Učinke na finansijske izvještaje nismo u mogućnosti kvantificirati (tačka 6.2.1 Izvještaja);
3. Ne možemo potvrditi iskazano stanje obaveza prema zaposlenima u Bilansu stanja u iznosu od 44.566 KM s obzirom na to da su one u Glavnoj knjizi iskazane kao pretplata u navedenom iznosu (dugovni saldo). Dio obaveza za doprinose iz i na plaću u ranijem periodu nije bio knjigovodstveno evidentiran, zbog čega je knjigovodstveno evidentiranje prinudne naplate iz 2015. godine u iznosu od 529.194 KM imalo za posljedicu nerealno iskazivanje obaveza prema zaposlenicima u Bilansu stanja (tačka 6.2.3 Izvještaja);
4. Nije uspostavljena knjiga kapitalne imovine te nismo mogli potvrditi strukturu nabavne vrijednosti iskazanih stalnih sredstava u iznosu od 587.083 KM, koja se odnosi na nabavnu vrijednost cesta i objekata vodovoda i kanalizacije. Navedeno nije u skladu sa Zakonom o računovodstvu i reviziji u FBiH, Uredbom o računovodstvu budžeta u FBiH i Pravilnikom o knjigovodstvu budžeta u FBiH (tačka 6.2.2 Izvještaja).

b) ZA USKLAĐENOST: S REZERVOM

Osnova za dato mišljenje

1. Opština nije sačinjavala planove novčanih tokova i operativne planove. Navedeno nije u skladu sa Zakonom o budžetima u FBiH (tačke 4. i 5. Izvještaja);



2. Opština se u pojedinim slučajevima nije pridržavala ograničenja utvrđenih Budžetom, te su stvoreni rashodi i izdaci, odnosno preuzete su obveze iznad iznosa odobrenih posebnim dijelom Budžeta za te namjene u iznosu od najmanje 69.579 KM (izdaci za električnu energiju, ugovori o djelu, izdaci za nabavku motornih vozila i drugo). Navedeno nije u skladu s odredbama Zakona o budžetima u FBiH (tačka 6.1.2 Izvještaja);
1. Nije proveden cjelovit popis sredstava, potraživanja i obaveza, te nije provedeno usaglašavanje knjigovodstvenog sa stanjem utvrđenim popisom kako je to predviđeno Zakonom o računovodstvu i reviziji u FBiH i Pravilnikom o knjigovodstvu budžeta u FBiH (tačke 6.2.2 i 6.2.5 Izvještaja).

- **OBAVIJEST O NEPROVOĐENJU ISTRAGE od 3. 7. 2023. godine**

Na osnovu člana 231. stav 3. i 4. ZKP-a FBiH Tužilaštvo je donijelo naredbu da se istraga neće provoditi u predmetu T10 0 KTA 0010168 22 formiranom na osnovu Izvještaja o finansijskoj reviziji Ureda za reviziju institucija u FBiH za Opštinu Bosansko Grahovo za 2021. godinu u kojem je izraženo negativno mišljenje s rezervom o usklađenosti, **jer je iz prijave i pratećih spisa očigledno da prijavljeno djelo nije kazneno djelo.**



3. JAVNO PREDUZEĆE „KOMUNALNO“ D.O.O. LIVNO ZA 2021. GODINU


Izvještaj o finansijskoj reviziji broj: 01-02-09-11-4-3041-6/21 od 2. 9. 2022. godine, dostavljen Tužilaštvu Kantona 10 Livno 1. 11. 2022. godine u skladu s članom 16. stav 1) Zakona o reviziji institucija u Federaciji BiH („Službene novine FBiH“, broj 22/06)

MIŠLJENJE REVIZORA

a) ZA FINANSIJSKE IZVJEŠTAJE: S REZERVOM

Osnova za dato mišljenje

1. Na datum bilansa nije izvršena ocjena postoje li bilo kakvi pokazatelji da je vrijednost nekog sredstva umanjena, niti je vršena procjena nadoknadive vrijednosti za takva sredstva shodno MRS-u 36 – Umanjenje vrijednosti imovine, i odredbama Zakona o računovodstvu i reviziji u FBiH. To može imati za posljedicu da je nadoknadivi iznos sredstava manji od njihove knjigovodstvene vrijednosti iskazane u iznosu od 1.194.422 KM, a efekte na sredstva i finansijski rezultat nismo mogli kvantificirati (tačka 7.2.1 Izvještaja);



2. Zalihe materijala i rezervnih dijelova iskazane su u iznosu od 234.480 KM i za njih Društvo nije vršilo vrednovanje, odnosno usklađivanje neto nadoknadive vrijednosti u skladu s Pravilnikom o računovodstvenim politikama i MRS-om 2 – Zalihe. Efekte usklađivanja zaliha na finansijski rezultat nismo mogli kvantificirati (tačka 7.2.2.1 Izvještaja).

b) ZA USKLAĐENOST: NEGATIVNO

Osnova za dato mišljenje

1. U Društvu nije formiran odbor za reviziju koji razmatra studije rizika i osigurava da interne kontrole budu adekvatne i funkcioniraju kako je predviđeno, što nije u skladu sa Statutom i Zakonom o javnim preduzećima u FBiH. Pored toga, nije formiran ni odjel za internu reviziju u skladu sa Zakonom o računovodstvu i reviziji u FBiH, što je obaveza Društva kao subjekta od javnog interesa (tačka 4. Izvještaja);
2. Ugovori o radu na određeno vrijeme, koji se odnose na sve radnike primljene u radni odnos tokom 2021. godine (ukupno 15 radnika zaposlenih na period od dva do sedam mjeseci), zaključeni su bez provođenja javnog konkursa, što nije u skladu sa Zakonom o radu koji propisuje da se prijem u radni odnos vrši nakon provedene procedure obaveznog javnog oglašavanja, niti je ispoštovan princip transparentnosti i jednakog pristupa pri zapošljavanju (tačka 4. Izvještaja);
3. Društvo nije stavilo u funkciju sve mjerače zahvata, odnosno protoka vode, te ne raspolaže tačnim informacijama o količini zahvaćene vode, što ima za posljedicu da se gubici na vodovodnoj mreži ne mogu precizno utvrditi, kao i da se obračun posebnih vodnih naknada za korištenje površinskih i podzemnih voda nije vršio u skladu s Pravilnikom o načinu obračunavanja, postupku i rokovima za obračunavanje i plaćanje i kontroli izmirivanja obaveza na temelju opće vodne naknade i posebnih vodnih naknada (tačke 7.1.1.1 i 7.2.4.3 Izvještaja);
4. Društvo nije obračunalo niti platilo porez na dodanu vrijednost u 2021, kao ni ranijih godina, za posebne vodne naknade za korištenje površinskih i podzemnih voda i naknade za ispuštanje otpadnih voda u skladu sa Zakonom o porezu na dodanu vrijednost. To može imati za posljedicu dodatne troškove za Društvo (tačka 7.2.4.3 Izvještaja);
5. Uprava Društva nije sačinila trogodišnji plan poslovanja u skladu sa Zakonom o javnim preduzećima u Federaciji Bosne i Hercegovine i Statutom Društva (tačka 6. Izvještaja);
6. Društvo, iako je bilo obavezno, nije u potpunosti primjenjivalo odredbe Zakona o javnim nabavkama, kao ni odredbe njegovih provedbenih i internih akata, kako bi se osigurala transparentnost i omogućio veći stepen stvarne konkurencije i efikasnije trošenje javnih sredstava. Također, nije sačinjen provedbeni propis o javnim nabavkama u skladu sa Zakonom o javnim preduzećima u FBiH i Statutom Društva, niti su izvršene izmjene i dopune Plana javnih nabavki zbog značajnog odstupanja realiziranih u odnosu na planirane nabavke (tačka 8. Izvještaja).




- **OBAVIJEST O NEPROVOĐENJU ISTRAGE od 3. 10. 2023. godine**

Na osnovu člana 231. stav 3. i 4. ZKP-a FBiH Tužilaštvo je donijelo naredbu da se istraga neće provoditi u predmetu T10 0 KTA 0010165 22 formiranom na osnovu Izvještaja o finansijskoj reviziji Ureda za reviziju institucija u FBiH za javno poduzeće Komunalno d.o.o. Livno za 2021. godinu sa obavijesti o indicijama na kršenje zakona, **jer je iz prijave i pratećih spisa očigledno da prijavljeno djelo nije kazneno djelo.**



**H. IZVJEŠTAJI O FINANSIJSKOJ REVIZIJI DOSTAVLJENI KANTONALNOM
TUŽILAŠTVU POSAVSKE ŽUPANIJE**

Za jedan izvještaj finansijske revizije koji je dostavljen Kantonalnom tužilaštvu Posavske županije, po osnovu člana 16. Zakona o reviziji, tužilaštvo je dostavilo informaciju da je izdalo naredbu za prikupljanje dokaza.



REVIZIJA UČINKA

U narednom dijelu prezentuju se informacije o postupanju tužilaštava po osnovu tri izvještaja revizije učinka, koja su im dostavljena u toku 2023. godine. Radi se izvještajima u kojima su konstatovane indicije o značajnim kršenjima zakona, koje su dovele do rasipanja javnih resursa i neefikasnog pružanja javnih usluga. Imajući u vidu da je predmetnim revizijama obuhvaćen veći broj institucija s područja cijele FBiH, revizorski izvještaji dostavljeni su kantonalnim tužilaštvima onih kantona na čijem području je sjedište revidiranih institucija.

A. IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU KANTONA SARAJEVO

Ured za reviziju dostavio je Kantonalnom tužilaštvu Kantona Sarajevo tri izvještaja revizije učinka po osnovu člana 19. Zakona o reviziji, i to:

- Praćenje realizacije preporuka iz Izvještaja revizije učinka „Efikasnost drugostepenih organa u postupanju po žalbama“ objavljeno u 2022. godini;
- Izvještaj „Upravljanje robnim rezervama u Federaciji BiH“ objavljen u 2022. godini;
- Praćenje realizacije preporuka iz Izvještaja revizije učinka „Transparentnost zapošljavanja u javnim preduzećima FBiH“ objavljeno u 2021. godini.

Kantonalno tužilaštvo:

- za jedan izvještaj donijelo je obavijest o neprovođenju istrage;
- za jedan izvještaj dostavilo je informaciju da se aktivno vrše provjere u fazi prijave;
- za jedan izvještaj nije dostavilo povratnu informaciju.

U nastavku je pregled izvještaja za koji je dostavljena obavijest o neprovođenju istrage.

1. UPRAVLJANJE ROBNIM REZERVAMA U FEDERACIJI BIH

Ured za reviziju je 19. 7. 2023. godine dostavio Kantonalnom tužilaštvu Kantona Sarajevo obavijest kojom ukazuje na indicije o značajnim kršenjima zakona, koje su utvrđene na osnovu revizije učinka „Upravljanje robnim rezervama u Federaciji BiH“ iz 2022. godine. U obavijesti su istaknuti problematični aspekti u postupcima nabavki roba za potrebe robnih rezervi koje vode Federalna direkcija za robne rezerve i Direkcija za robne rezerve Kantona Sarajevo, posebno ističući tačku 3.3.2 izvještaja.

Važno je istaknuti da izvještaj sadrži informacije koje su, prema važećim zakonima o robnim rezervama, klasificirane kao državna tajna. U skladu s tim Ured za reviziju postupio je s izuzetnom pažnjom, pripremajući izvještaj kao povjerljiv dokument, shodno članu 45. Zakona o reviziji institucija u Federaciji Bosne i Hercegovine, čime se osigurava da se s osjetljivim informacijama postupa propisno i odgovorno.



- **OBAVIJEST O NEPROVOĐENJU ISTRAGE od 4. 12. 2023. godine**

U vezi s članom 231. stav 4. ZKP-a FBiH, Tužilaštvo je 4. 12. 2023. godine donijelo naredbu o neprovođenju istrage, jer je u skladu s članom 231. stav 3. ZKP-a FBiH očigledno da prijavljeno djelo nije krivično djelo.



- **PRITUŽBA NA OBAVIJEST O NEPROVOĐENJU ISTRAGE broj 10-11-7-2097-2/23 od 11. 12. 2023. godine**

Zbog činjenice da direkcije nisu provodile postupke javnih nabavki u skladu sa Zakonom o javnim nabavkama i da nije osigurana transparentnost i ispoštovan princip jednakog pristupa i konkurencije u postupcima javnih nabavki, s ciljem najefikasnijeg korištenja javnih sredstava, smatramo da Tužilaštvo treba provesti istragu, u skladu s odredbama Krivičnog zakona Federacije BiH.

B. IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU HERCEGOVAČKO-NERETVANSKOG KANTONA

Ured za reviziju poslao je Kantonalnom tužilaštvu Hercegovačko-neretvanskog kantona jedan izvještaj revizije učinka po osnovu člana 19. Zakona o reviziji, i to:

- Praćenje realizacije preporuka iz Izvještaja revizije učinka „Transparentnost zapošljavanja u javnim preduzećima FBiH“ objavljeno u 2021. godini.

S obzirom na to da Kantonalno tužilaštvo Hercegovačko-neretvanskog kantona nije obavijestilo Ured o statusu predmetnog izvještaja, zatražena je informacija o postupanju tužilaštva, ali do zaključenja publikacije tužilaštvo nije dostavilo odgovor.

C. IZVJEŠTAJI REVIZIJE UČINKA DOSTAVLJENI KANTONALNOM TUŽILAŠTVU SREDNJOBOSANSKOG KANTONA

Ured za reviziju poslao je Kantonalnom tužilaštvu Srednjobosanskog kantona jedan izvještaj revizije učinka po osnovu člana 19. Zakona o reviziji, i to:

- Praćenje realizacije preporuka iz Izvještaja revizije učinka „Transparentnost zapošljavanja u javnim preduzećima FBiH“ objavljeno u 2021. godini.



Kantonalno tužilaštvo je donijelo obavijest o neprovođenju istrage za taj izvještaj.

Detalji o izvještaju za koji je dostavljena obavijest o neprovođenju istrage prezentirani su u nastavku.

1. PRAĆENJE REALIZACIJE PREPORUKA IZ IZVJEŠTAJA REVIZIJE UČINKA „TRANSPARENTNOST ZAPOŠLJAVANJA U JAVNIM PREDUZEĆIMA FBiH“

Ured za reviziju je 19. 7. 2023. godine dostavio Kantonalnom tužilaštvu Srednjobosanskog kantona Obavijest u kojoj su istaknute indicije o postojanju značajnih kršenja zakona koje su utvrđene u Izvještaju revizije učinka „Praćenje realizacije preporuka iz Izvještaja revizije učinka na temu 'Transparentnost zapošljavanja u javnim preduzećima FBiH' koji je objavljen u 2021. godini.

U okviru Izvještaja o praćenju realizacije preporuka posebno se ističu nalazi vezani za proces zapošljavanja u ZD RMU „Abid Lolić“ d.o.o. Travnik – Bila, detaljno predstavljeni u poglavlju 2.1.4. Ovi nalazi privukli su pažnju zbog svoje važnosti u kontekstu transparentnosti i pravednosti postupaka zapošljavanja.

- OBAVIJEST O NEPROVOĐENJU ISTRAGE od 27. 11. 2023. godine

Na osnovu člana 231. stav 4. Zakona o krivičnom postupku Federacije Bosne i Hercegovine Tužilaštvo je obavijestilo da je 27. 11. 2023. godine donijelo naredbu o neprovođenju istrage, jer je iz prijave i pratećih spisa očigledno da prijavljeno djelo nije krivično djelo.





ZAKLJUČAK GENERALNOG REVIZORA

Ured za reviziju daje poseban značaj informisanju javnosti o utvrđenim nepravilnostima i nezakonitostima u radu javnog sektora blagovremenim i javnim objavljivanjem revizorskih izvještaja. Izvještaji u kojima su utvrđene materijalno značajne i prožimajuće nepravilnosti, i u kojima postoje indicije o značajnim kršenjima zakona, dostavljaju se i nadležnim kantonalnim tužilaštvima kako bi ih koristila kao temelj za pokretanje istraga. Na ovaj način Ured za reviziju, u skladu sa Smjernicama za reviziju prevencije korupcije (GUID 5270), ostvaruje svoju preventivnu ulogu u otkrivanju korupcije i drugih nepravilnosti i doprinosi unapređenju sistema finansijskog upravljanja i kontrole u javnom sektoru.

Podaci prezentovani u ovoj publikaciji pokazuju da nadležna kantonalna tužilaštva u prethodnom periodu nisu adekvatno iskoristila revizorske izvještaje kako bi identificirala potencijalne slučajeve koruptivnih radnji i krivična djela. Od 47 odgovora koja su tužilaštva dostavila, njih 22 odnose se na odluke o neprovođenju istrage i odluke o obustavi istrage. Iako se radi o revizorskim izvještajima u kojima su jasno opisane nepravilnosti i indikatori korupcije, i u kojima su najčešće data negativna mišljenja, tužilaštva nisu našla osnove za pokretanje tužilačkih istraga.


Posebno je indikativan dug period od slanja revizorskih izvještaja tužilaštvima na nadležno postupanje do dostavljanja povratnih informacija o preduzetim radnjama. Određenim tužilaštvima potrebno je i nekoliko godina da dostave obavijesti o postupanju, a pojedina ih uopće nisu dostavila, iako su im revizorski izvještaji poslani još 2016. godine. Evidentni su i slučajevi da tužilaštva nisu postupala hronološki, prema redoslijedu zaprimanja revizorskih izvještaja. Vrlo često najbrže postupaju po revizorskim izvještajima koji su im posljednji dostavljeni, dok su za izvještaje iz ranijeg perioda odluke donesene nakon nekoliko godina ili nisu uopće donesene. Ovakvo postupanje stvara percepciju neefikasnosti i nedostatka odgovornosti, naročito imajući u vidu da su optimalni rokovi za postupanje tužilaštava, propisani Pravilnikom o vremenskim okvirima za postupanje po predmetima u sudovima i tužilaštvima u Bosni i Hercegovini i Aneksom istog Pravilnika, mnogo kraći.

Pasivnost institucija, posebno kada se radi o procesuiranju korupcije, umanjuje povjerenje građana u institucije vlasti i narušava vladavinu prava, a u konačnici rezultira slabljenjem demokratskih procesa i degradacijom moralnih vrijednosti društva. Kada ambijent u kojem se korupcija toleriše i prihvata postane dio svakodnevnog života, shvatimo da je erozija duboko zahvatila društvo.

Kao vrhovna revizijska institucija dužni smo da ukažemo na nepoštovanje zakona, kreiranje ambijenta u kojem se stvara neefikasnost i rasipanje javnog novca, čije posljedice u konačnici trpe građani. Pozivamo sve nadležne institucije da posvete dužnu pažnju pitanju integriteta i odgovornosti kako bi opravdale utrošena javna sredstva i svrhu svog postojanja. Samo sinergijsko djelovanje institucija može osvijetliti put ka transparentnom i odgovornom javnom sektoru kojem se vjeruje i koji istinski služi svojim građanima.

Nastavit će se...

Dževad Nekić, mr. ecc. sc.



URED ZA REVIZIJU INSTITUCIJA U FEDERACIJI BIH

Dževad Nekić, generalni revizor

Dragan Kolobarić, zamjenik generalnog revizora

Mia Buljubašić, rukovoditeljica Sektora za razvoj, metodologiju i
upravljanje kvalitetom

Lektura

Šejla Hukara, viša stručna saradnica – lektorica

71 000 Sarajevo
Ul. Ložionička br. 3
Bosna i Hercegovina

Tel.

+387 (0) 33 723 550

Fax

+387 (0) 33 716 400

E-mail

vrifbih@vrifbih.ba

Web

www.vrifbih.ba